

ASO LUA, 02 FEPUARI 2021

Na nofoia e le Fofoga Fetalai le Nofoa i le itula e 9:22 i le taeao.

Tatalo.

FOFOGA FETALAI: Ou te faasilasila atu ua amatalia Tualumaga ma Galuega a le Fono Aoao Faitulafono.

Ia malo le lagi e mama malo le soifua manuia, malo foi le tauatai i lenei taeao fou i le tatou galuega.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2020/2021 – felafolafoaiga faaauau
i luga o le faitauga faalua – Aso 10**

FOFOGA FETALAI: E tolopo Galuega a le Fono Aoao i le aso Fono ananafi ua maea ona saunoa le sui usufono mamalu mo le itumalo faaalaalafaga o Anoamaa Sasae.

Ia, ma lou faaaloalo tele ou te tapa se sui usufono e tulai mai e saunoa. O lea ua tulai mai lau Afioga ia Laauli, o le sui usufono mamalu mo Gagaifomauga Nu.3, ou te tapa ma le faaaloalo lau Afioga mo le saunoaga.

Susuga Hon LAAULI POLATAIVAO LEUATEA (Gagaifomauga Nu.3): E momoli atu le agaga faafetai tele i lau Afioga i le Fofoga Fetalai o le tatou Maota Fono mo lou avanoa. Ou te muai faatalofa foi i le paia ma le mamalu maualuga o le tatou Maota i ona tulaga faalupe i lenei foi taeao fou ma lenei foi taeao manuia. Ou te ofo alofa atu i le agaga faaaloalo. E faapena foi ona ofo alofa atu ma faatalofa atu i le faafofoga tapuai mai a si o tatou atunuu, Samoa le atunuu pele, ia, o se taimi oo atu se faamatalaga.

Ae avefa ia lenei avanoa taua e momoli atu ai se upu faaiu ma se lauga e tauavamea ai le faaiuga o lenei Nofoaiga a lenei itumalo lau Afioga i le Fofoga Fetalai.

E muamua ona ou faatulou i le Atua Soifua e ou le mana ma le malosia uma lava, o le Atua le Tama, le Atua le Alo ma le Atua le Agaga Sa, o le Atua o Samoa, o le Atua o Aperaamo, o le Atua o Isaako, o le Atua o Iakopo ma le Atua o Isaraelu.

A o lenei taeao ua ou manatua le tala a Tagaloaalagi na fai ia Lufasiaitu, fai mai Tagaloaalagi, a taape lou falealii, ona goto ifo lea i le palapala o lou lagituaiva, a o lou ao o le a taape ia Samoa. O lea ua lagia Tiafau o le malae o le faautugatagi a Samoa, o le Maota e taape ai tofiga a manusisina e le soaina. Ona ou faatulou lea aua lagi e fia e malu ai Samoa i ona tulaga faalupe, malu ai aiga, malu ai faleupolu o tofiga. Aisea? O lea ua lologo Tiafau i le leo o le faavauvau, ona ua faia se tasi o pou o le fale o Samoa aua le valaau paia a le Atua. Tulou le masaesae o le lagi, tulou le gauolosaa, tulou le gasolosolo o ao, tulou le to o le timu, tulou le taape o papa, aua le paia o le Aiga Sa Tuala, le Aiga Taulagi ma le Matua, mamalu ia Maauga, tainane Tuisavailuu ma le Faleaana. E le mafai ona galo se mafutaga sa lelei, aua lea ua velo le maninoa o le tia e le seua le finagalo o le Atua, ua tatou faaifo ai le taulaumea ma loifofoga ona o le malaga a le uso.

O le matou tatalo, ia faamaise le Atua i le itumalo o Lefaga ma Faleaseela, tatou lototetele e pule le Atua i lo tatou ola. Tatou faamaise foi i le faletua ia Vaelaa ma le nofo a alo, tatou faamaise i aiga, paolo ma gafa. Ua moni le li'a Vaafusuaga, tatou te talasua pea i tatou fonotaga, o le Nofoaiga lenei e te faamavae ai ma le Palemene. Ui o lea, e le faia so tatou loto, leaga e le galo oe le uso e militino faatasi mai le laiti i le aoga e oo mai i le Palemene, ma o oe le isi tama Malisi e fai lou fatu. Manuia lau malaga, tatou feiloai i se aso.

E muamua ona ou faatulou Samoa i ou sa ma ou faiga, o le a ou le toe fuli se maa, aua o oe lava o le ao mamala, o le i'a iviivia e leai se potu leai se vave na te toe autalaina pe toe autalatala ou fue lavelave o ou fuesina loloa ma ou afa loloa, aua le paia o Aiga o Tupu, Aiga o Nofo, Aiga o Papa ma Aiga na Tafaiifa, tainane Aiga nai le ite a le malama ua tatou maua ai ao ma iu o Malo.

O le paia lava lea aua Aiga ma a latou Tama, o Tama ma o latou Aiga, le usoga a Tumua ma Pule, Ituuu ma Alataua, Aiga i le Tai ma le Vaa o Fonoti. E faatalofa atu i le nofo a faafeagaiga i so o se fatafaitaulaga. Tulouna Malaeola ma Nafoga, tulouna Faleu ma Utuagiagi, tulouna ia paia o sa ma faiga aua Mataniufeagaimaleata. Tulouna le paia aua le mamalu o Samoa potopoto mai ona ao seia oo i ona iu.

E faatulou foi aua le tapuaiga a Lana Afioga Mamalu O Le Ao o le Malo, lau Afioga i le Tuiaana Tuimalealiifano ma lau Masiofo. E faatulou aua le Sui o le Fono a Sui Tofia lau Afioga Le Mamea Ropati ma lou faletua.

Ou te faapai atu i lau Afioga i le Fofoga Fetalai, tainane le paia maualuga o sui usufono uma o le Palemene, o tatou lava o lupe na faia mai le fuifui aua le filiga a Samoa tatou te omai e fai le tautua i lenei Nofoaiga.

E faatalofa atu i lau Afioga i le Taitai o le Malo lau Afioga i le Palemia ma lou auvaa ma le mamalu maualuga o lau Kapeneta.

Ou te faatalofa atu foi i le ituvai o le Faamasinoga i le apulupuluia o le fala i tofaga i lau Afioga i le Faamasino Sili aemaise lau Afioga i le Peresetene ma alii ma tamaitai o le Faamasinoga a Samoa.

E faatalofa atu foi i le paia maualuga o le aufaigaluega a le Malo, Ofisa Sili o Pulega o Matagaluega ma Faalapotopotoga Tumaoti, aemaise le lavalaoa o outou lava o tupu ma ee, tamalii ma failauga, o faletua ma tausī, saoa ma tamaitai o lo o vae ma lima i ai le tatou Malo.

Ou te faapai foi i lea itu o le vai aua le tatou va nonofo ma Tutuila ma Manua. Tutuila ma Manua e le tau fofola so tatou fala, o tatou o le aiga aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele ma le Faleagafulu o le Motu, Tootoo o le Faleula ma le Laau na Amotasi ma upu ia te oe le Manuatele. O le mavaega nai le vasa e fetau ai fola o tupu i le vasa, aua Malietoa ma le Tuimanua. Tuimanua o le a e nofo i lena itu o le ta aiga, tasi le Atua ta te tapuai ai, o le a ou foi i Tumua, a tapa le ava taumavae, fai mai na saasaa i le sami tafe le taisamasama ma le taiulaula, taute le Malietoa suati le lagi ae masaa i le sami tafe le vaipalolo ma le vaitoelau. O ta uputuu na ma le ta va nonofo o lo o tausī ai le ta va faafeagai ai e oo i le aso.

Ou te ofo alofa atu i le Faigamalo fou ma avatu moomooga alofa i lau Afioga i le Kovana, lau Afioga Lemanu Palepoi Siliaga Mauga, lau Afioga i le Lutena Kovana lau Afioga Talauega Eliasaro Vaalele Ale, lau Afioga i le Peresetene o le Senate, lau Afioga Tualo Manaia Eti Tuiletufuga Fruean ma lau Afioga i le Fofoga Fetalai lau Afioga Savali Talavou Ale, aemaise le mamalu maualuga o sui usufono uma o Maota e Lua. O le tatou va faafeagai ai ma mavaega a matua tatou te fetausiai ia aua ne i outou faatamala i le matou tapuai atu i Tumua ma Pule. O le tatou aiga e matitiva faafesagai ma ia outou manatua taē o i Atua i le taumafai atu a lou Malo Tutoatasi o Samoa.

O lele ua seese malie le vaatele o le Palemene o Samoa ua folau i tai faaii o lenei Nofoaiga, ma folau i Maota e tulutuluimoana ma Maota e tulutuluitao o Po ma Ao ina ua soo ona taiao ia Samoa. O lea foi ua manava le au taualo ina ua see maele le matagi, ua to ai nei i falemapu le tautai ina ua logo i Pulu le mapuea a le aufai-tofa ma le aufai-uta a Samoa, a o liuliu faalau-mamafa le faavaepopo o upu taoto o le Maota o Samoa ma lona Palemene, aua le atinaeina o le atunuu.

Ona manatu lea Samoa, ou te le iloaina le matuitui ma le tiga, tiga o le alofa na te saelua ina oe le atunuu pele. [.....]
Ou te faaogaina ai lenei avanoa taua e momoli atu ai le faafetai tele i le tapuaiga a si o tatou atunuu, mai le ituvai o le Talalelei, Taitai o so o se fatafaitaulaga ma le au ositaulaga uma i Samoa, e momoli atu le faafetai tele a lou sui usufono ona o la outou tapuai tatalo ma la outou tapuai leleoa ma la outou fatuaiga tausī o lo o saili ai manu o Samoa e ala i le Atua ma Lona finagalo. Ua faamalo le tai, ua faamalo le tapuai. O outou faiva alofilima ma la outou anava na filifili ai la outou vasega e le Atua mo le tausiga o Samoa,

ua faamalo fai o le faiva, ua faamalo onosai. E le faigofie lo outou faafalelemalu aemaise o lo outou faafaletuluia aua le talaiga o le Atua ma Lona finagalo, o lo o tatao lava i le moa o le ala Samoa ina ia tatou maua pea le lauolive o le faaolataga.

E avea foi lenei avanoa e momoli atu ai le agaga faafetai tele i le tapuaiga a si o tatou atunuu, Samoa i le pule mamalu a alii ma faipule, tupu ma ee, tamalii ma failauga, vae ane le saofaiga a tina, faletua ma tausī, saoa ma tamaitai seia oo i a tatou fanau pele ma le malosī o le nuu. O outou faiva alofilima o lo o mafai ai ona faatino e le Malo mea uma. O lo outou afumaligi ma lo outou afutoto, o la outou osigataulaga ma la outou maatogi o lo o mafai ai e le Palemene ma le Malo ona faatino mea uma e atinae ai si o tatou atunuu.

O le mea moni Samoa, e leai se faiva e aunoa ma se maumau, a o lo outou maau ma lo outou milomilosia, o lo outou afumaligi ma lo outou afutoto, o la outou pule lea. O lo o i ina le atoaga o mea uma, aua le va faafeagai ai o le tausiga o le mamalu, le maualuga, o le tamaoaiga, o le filemu ma le saogalemu, o lo o toa pea le tai ona o la outou tausiga ma le puipuiga aua Samoa atoa. Faamalo tautua Samoa, faafetai le tapuai. O nei mea uma o lo o lufilufi e lou Palemene, o lou tamaoaiga Samoa, o lou afumaligi Samoa, e momoli atu le agaga faafetai tele.

E avea foi lenei avanoa taua e momoli atu ai le faafetai tele i le paia ma le mamalu maualuga o Samoa o lo o aitaumalele i atunuu mamao, po o fea lava le tafa o le lalolagi lenei o lo o outou maua mai ai le iuleo o lenei taeao, e momoli atu le faafetai tele. E le mafai ona natia ifo i fatualavai, ma e tu manu ae le tu logologo e ala i la outou tautua oo, la outou tautua matapalapala, ma la outou tautua malo ma le tautua atunuu ma le tautua Ekalesia. Ua faamalo le fai o le faiva, ua faafetai le alofa.

O lea ua tulima nei le tula ua faaifo le segaula ua ae le faiva o alii ma ua tautau upega lauga, ua moto nei le agatonu ma ua mativa le fau ma ua papau le laulau ae faasavali ona alu, ae taute lau Afioga i le Fofoga Fetalai o le Maota Fono o Samoa. I lou agaga faaaloalo, e avea lenei avanoa taua, lau Afioga Leaupepe Toleafoa Apulu Faafisi, e le mafai e upu ma tala ona avatu se gagana i lenei ituaso, leaga e tautalaaso le aso, ae tele aso ae le lau aso. O lea ua faafofoga le lalolagi ma Samoa atoa i lou soifua auauna aemaise foi le faaiuina o lau tautua aua le Malo ma le atunuu. E avea ai lou leo e fai ma fofoga taumomoli o lenei itumalo e momoli atu ai le agaga faafetai tele ona o le tatou mafutaga. Faafetai tele i lau Afioga i le Fofoga Fetalai le tautua mo le Palemene, sa maua ai foi ni ai o i'a o lou vaa aua le mulimulitai ma solisolimulivae i galuega faa-Fofoga Fetalai i totonu o le Maota. E le galo lau tuualalo ina ua faatoa ou taunuu mai i le Maota, "Laauli, aua e te soona sii se i mau lelei ou vae, se i magoto lelei ou vae i le Maota ona fai lea o se upu." Faafetai timai, sa maua ai manatu ma lagona e fotufotuai ai le tautua

ina ia faaaauu. O le tatalo i le Atua, ia maua lou soifua e faaaogaina ai lau Afioga i le tele o nisi o feau ma tiute e toe tofia ai lau Afioga mo le lumanai.

Faafetai atu foi i le Afioga ia Honorable Aeau Peniamina, lau Afioga Honorable Tuitama Talalelei Tuitama, lau Afioga Honorable Faasootauloa Pati, ia, ma le Afioga ia Mulipola Laki. Malo le tatou pale feagai ai i lenei Nofoaiga, ia, ae manatu o lea ua sisi le taula o lo outou sa o le a foi i fanua. Faafetai mo le mafutaga. O a foi upu ma tala o le tatou va faafeagai ai, ia vaatele i lo outou finagalo, a o le tatou tu lava ma le aganuu faa-Samoa, tatou te o lava i le palapala ma le osiga o aiga. O manu na o la outou malologa malolo manumalo.

E momoli atu le agaga faafetai tele i lau Afioga i lau Afioga i le Taitai o le Malo, aemaise lou auvaa. Ou te taofi e leai se iota o mea uma o lo o tutupu e le silafia le Atua ma le silafia e le tapuaiga a si o tatou atunuu. O mea ua lelei ma matagofie, tatou viia le Atua. Malo le galulue, malo le onosai, malo le tauatai. E leai lava se faiva e aunoa ma se maumau. O a foi tatou upu ma tala felafoai ma taimi o tatou talanoaga i upufai o Malo, tatou ave lea i uta. Ua tatou tulalata i le faaiuga o le tatou galuega o lenei Nofoaiga, ma o lo o molimau le Atua molimau le atunuu i le tagata ma lana galuega na fai, ma e inu lava le manuia ma le lelei ona o la outou galuega sa lulu mo Samoa. E momoli atu le faafetai tele ma le faamalo i faiva alofilima o le tatou Malo. A i ai foi nisi taimi matou te tata logo a Masefau ma matou tatatuli, o alofaaga molipo ma pele leaga o lea tatou te i le vailiu e tasi o le sa e fau faatasi, o sa o Samoa, o sa o le Malo, o tatou uma o le Malo.

Ou uso e i le Palemene o Samoa, le tatou Vaega Faaupufai e Puipuia Aiatatau a Tagata, e nofonofa pea ma mafaufau ma tatū i le too ma tepa i le ata, leaga e le o se mafutaga puupuu ma se mafutaga e mafai ona faagalofie. E iu ina faaiu le taulaumea ma loifofoga ma upu ma tala, ae tatupu pea lagona o faaleleiga ma faamagaloga. Le tatou Vaega Faaupufai, e le faagalofie mafutaga ua pele ma mamae i futia ua sola ma aso ua alu. E le toe fia ta foi i tua le tili pe toe apaapa i ni mea na tutupu, ua mavae ia atuvasa ma ua ū i ai lou tua ae tuli i luma so tatou ai. E ui lava i lota naunau atu ta te le i faamavae ma e le faamavae foi, a ua fai lava lo outou loto. Ua ou inu, ua ou savali i luma e tuli se ai, a o le tatalo, o le tatou polokiki e uma iinei i le Maota Fono, ae tatou te o lava i le tuugamau e osi aiga ma fai le tatou va nonofo ai.

E momoli atu le agaga faafetai tele i lo outou onosai, e momoli foi le agaga faafetai tele i lo outou faapalepale, i lo outou tautua malo i a outou Afioga i Taitaifono, Sui Taitaifono, aemaise o sui usufono uma o tatou Komiti mamalu sa tatou militino ma tatou galulue faatasi ai. O tatou na fai mai le lupe o fuifui aua le Nofoaiga lenei.

Ua ou toe tomanatu ia i matou na totoe mai si a matou auvaa na matou omai faatasi i le 2006, e le o toe toatele nisi. O le Afioga ia Gatolaifaana, o le Afioga i le Minisita ia Sala Pinati, le Afioga ia Olo Fiti, le Afioga i le

Minisita ia Loau, ma le Afioga ia Lealailepule ma le Susuga ia Lufilufi. Toe pau lena o e na totoe i le ulufale faatasi mai i le Nofoaiga lenei. Ma e le i faigofie le tau mai i e sa i ai tulatoa o le atunuu, e tau piipiiama aua se manatu ma se lagona mo le atunuu. Ae amuia tatou e le o tuua tatou ia tama, ia outou silasila i le siosiomaga o le Maota lenei, silasila o lo o pulapula mai fofoga o e na asaina le gasu o le taeao mai le uluai Palemene e tau mai ia i tatou i le taeao lenei, mai le uluai Ao o le Malo e oo i le Tuiaana, le uluai Fofoga Fetalai e oo i le Afioga ia Toleafoa, le uluai Palemia e oo i le Alo o Malietoa, e leai se isi e le o i ai se mauili i le Maota lenei i le taeao lenei. O ala ia e tautala ma le faaeteete, e tautala foi ma le totoa leaga e le i faigofie pe sa faapefea ona fau Samoa. Ia o tatou manatunatu lelei ma o tatou silasila mamao i le latou galuega na fau ao fau po. Fau faapefea? Na fau mai le mativa ma le le tagolima, fau mai puapuaga ma faigata, fau mai le loimata maligi ma le loto faavauvau na fano ai le ola. O le ala lea le paia e o le Palemene i lenei taeao, e le mama lo tatou valaauina. O tatou na filifili mai lenei Nofoaiga, viia le Atua ona o le galuega ua na faia.

Avea foi lenei avanoa taua e avatu ai foi lau faamalosiua ia outou o ou sui usufono, ia outou finagalo malilie o lea foi ua ou agai e tuli i luma se ai i le taumafaiga foi o lenei Vaega Faaupufai o le Faatuatua, lenei Aiga o le Faatuatua i le Atua Samoa ua Tasi, e momoli atu foi le faamalosiua mo outou uma. Ia outou pea mai ua faataumatatao e ala i la outou tofiga i nisi o o faatasi ma sui o lenei aiga. Ae afai tatou te tatou te talitonu o tatou o tagata filifilia mai le Atua, e leai se mea tatou te popole ai. E faapena foi ona avatu le faamanuia i nisi o itumalo e le o i ai ni sui o lenei aiga, Faatuatua i le Atua Samoa ua Tasi. Ia, o outou mama na. E le fai atu se tala e i ai le mafuaaga.

Lau Afioga i le Minisita Lautafi, e lafalafa a tuna o oe o Asiata, o la e faalogologo mai lo matou aiga, Satupaitea, ia manuia lou toe tulai mai. Tatalo i le Atua.

E faapena foi nisi o sui e le o i ai ni sui o lenei aiga, e avatu foi la matou faamanuiaga. Tuisamau, ua uma foi ona fai atu sa matou upu, o manu na, ae tatou o e tapena fiafia le faiga filifiliga a Samoa. Lo tatou aiga o le Faatuatua i le Atua Samoa ua Tasi, ia, e momoli atu le faafetai ma le faamalo. E le natia ifo i fatualavai le agaga faafetai atu ona o le tauavagameaina o le tatou faamoemoe. O outou lava o lupe o le a faalele aua Samoa. Na pau lava lea o le tatalo ma le tatou anava matau ma le anava masani, o lalo e saili ai Malo. Tatou onosai ma tatou faapalepale ma le talitonuga, o a luitau o lo o agai mai i le taimi lenei, tatou tausii le filemu. Aua nei i ai se peau e laga, pe aua ne i i ai se mea e tasi e tutupu ai nisi faafitauli ma ni faalavelave tatou te le manaomia. A o le tatalo ia alofagia e le Atua lo tatou faamoemoe. Ia silasila mamao i le tatou Faavae, e na o le Atua tatou te faatuatua i ai, tausinioga aua Samoa. O a foi ni galugalulu ma ni vevesi ma ni upu ma ni tala, lo tatou aiga, toa le tai, toa le tai.

E avea foi lenei avanoa taua ou te faapai atu ai i le paia ma le mamalu o Samoa, i Samoa nei ma atunuu e mamao. Lo tatou aiga ia outou alofagia, Samoa tatou te sisi le fua o le faaaloalo ma le faatamalii. Ia outou finagalo malilie, faamama le sausau, ma ia aua ne i o tatou faia ni upu e tupu ai ni vevesi ma le lē fealofani o lo tatou atunuu. O le tatalo lena ia te au nei, ua avea ma sao o lo tatou aiga, ia toa le tai, tatou tapena ma le loto alofa ma le faamaoni, ma savavali i le agaga o le loto mauualalo i le Atua ona tatou maua lea o ao ma iu o Malo.

E avea lenei avanoa taua lau Afioga i le Fofoga Fetalai, e momoli ai se upu i le tapuaiga a si ou itumalo. O aiga Sa Tupua ma aiga Sa Malietoa ma le Faletolu, le paia aua le Aiga o Mavaega. O le Falelima o Saeseese, lau fetalai Pao ma lena itu o le vai aemaise le tapuaiga a ou tama uma i so o se Fatafaitaulaga, o lo o outou tapuaiga aua le alofaiva aua le Palemene o Samoa. Faafetai tele i la outou pule lo tatou itumalo. E pei lava o au upu e fai pea ma tuu atu pea i tatou mafutaga i aso uma ma taimi uma, e le faia sou loto a o lo outou finagalo, e le fai foi mo au le tofi lenei ou te tulai ai i le taimi lenei. E le one tomai ma le one tama fanau lo tatou nuu ma le itumalo, a o lou taimi e tapena ai taeao. Lou itumalo, o lena e i ina le pule atoa, pule outou i le taimi e faaiu ai lau tautua i le itumalo. Ae na o lou ola e ofoina atu pea, ina ia ave ia aoga, faaauau le tautua, a o lo o i ina le atoaga. O sau tala ma se upu ua lape i le tatou mafutaga, i le sousou o le vasa ma le fita o le ala. Sa ou afu ai i le ie talatala ma ou moe i le lefulefu i le Nofoaiga lenei, lou itumalo faamagalo au. Sa ou moe ma manu ae sau lava mala e atiae. O le tulaga ua i ai ma la outou faatofalaiga ua ou tulai ai i le taimi lenei. E tauave le isi vaega Faaupufai ua maea foi ona outou finagalo i ai, tatou ave lea i uta. O le tatou talitonuga, sisi pea le fua o le manumalo o Keriso ina ia manuia Samoa ma lona Malo.

O ou aiga uma o lo o salalau ia Samoa atoa, ia malo le ta'i, malo foi lo outou onosai. O uo ma aumea mamae sootino soototo sooaano, faafetai i la outou tapuaiga. Ia faafetai i la outou tatalo, faafetai i la outou faamanuia, e mai ona ao seia oo i ona iu, o fea lava o outou alala ma papaaao ai, faafetai tele mo le lagolago mai mo le faamoemoe lenei.

E pei lava o upu sa ou fai atu, e le tapenaina se mea faaletonu mo le atunuu, ma e le tago faatumutumulima pe olegia le atunuu. Le Atua Alofa, a i ai ni upu ma ni tala o e silafia, o i ai tulaga ia, fai lau faaiuga i le ola. A o le upu tautino ma le upu manino, e ave le amiotonu ina ia tausii le filemu ma ia manuia si o tatou atunuu.

O ou aiga uma tatou te feiloai pea i talosaga, ma le agaga ia tatou tausii le tatou anava, ia o tatou ave la tatou galuega mo le Atua.

Lau Afioga i le Sao Faapito, lau Afioga Fiamē Naomi Mataafa, i lou agaga faaaloalo e ui lava ina le i faataunuuina. Ia avea lenei avanoa taua e momoli atu ai lau faafetai tele, ona o le tofa aemaise lau malelega ua faafofoga i ai le atunuu, tatou te faatasi i totonu o lenei aiga pe a maea lenei Nofoaiga. O

le tatalo foi lea, ia mau pea le toovae, mau foi le uta aemaise o le onosai ma le faapalepale. I mea uma ua tulai mai i le taimi lenei ma le tatou savaliga. E momoli atu foi le faafetai tele i lau Afioga Faumuina, e le lilo e le lanu. E le faigofie foi le asaasaina o ou puapuaga ma ou faigata na e asa mai ai. Ae tatou tulimatai i luma i le Atua le tatou savaliga ma le faamoemoega. Lau Afioga i le sui usufono mo Salega, Olo, e maualuga e le aea e se fili ma se tiapolo le lagi ma le lalolagi. Ua faamalo i lau Afioga i le sui usufono, na ta fuifui faatasi mai i le Nofoaiga XV o le Palemene, na ta o mai loa vaelua alavaa ta te o ai. O o ta loto ia na fai, ae viia le Atua ua fai lona fingalo, ua ta maea e tasi ai aua lo tatou faamoemoe. Ua faamalo le onosai, faamalo le tau toatasi, faamalo le galue, faamalo le tautua Malo. O a ni faaletonu o lo ta va faafegai ai i futia ua sola ma aso ua alu, faamalulu atu. Ia tepa i luma ma alo i luma lo tatou vaa aua lo tatou atunuu.

O atoaga na lau Afioga i le Fofoga Fetalai, o se faafetai a lenei itumalo. E momoli atu le faafetai tele i lau Afioga ma le tapuaiga, aemaise le Palemene ma ou aiga.

Si ou toalua ma lau fanau, mom, thank you for everything. E faafetai tele, e lagona pea le mafanafana o le loto ma le tata o le fatu, i lau pai mai faatina, i lau pai mai faatagata alofa moni i lou taumafai i mea uma aua lo ta itumalo.

O le Tala o le Tupe, lau Afioga i le Minisita o Tupe, e avatu lava le agaga faafetai tele, talofa e ua ta alofa atu lava. E le gata ina fou lou tulai mai, ae ua e feagai ma taimi o le luluti o le faasoa. Ua faamalo le faasoa, faamalo le polopolo, faamalo le tulaga o le tauavameaina o le tatou Tala o le Tupe.

Lau Afioga i le Minisita o Faiga Palota, e vaaia pea ma le agaga faanoanoa, ona o le tulaga lea ua maea ona pasi le tatou Tulafono o Faiga Palota. Ma e i ai tulaga nei o le tasi o anava. O le faalauiloina lea o tatou Vaega Faaupufai, i le atunuu. Na agai ai e faatutu laupapa ma fai savali faamalamalama i le atunuu. O lo o ua aiaia e le Tulafono ua uma ona pasi i lalo o le Maota, o le Maota Faitulafono o le Malo o Samoa. Na pasi uma ai mea nei, o mea nei e alu ai le tagata pe a manao e avea ma sui usufono o le Palemene. E fai billboards, fai ana pamphlets, fai lana anavatau ma agai e faalauiloa lona tagata i le itumalo. Ae peitai e vaai ma le faanoanoa, ona o tulaga ua tulai mai. E oo mai i le aso na amata ai si a matou taumafaiga, o le feiloaiga ma le atunuu. E oo mai i le aso ananafi, o fai pea le tulaga o le toe felavasai o pule. O le mea lea sa ou popole tele ai i le tulaga o le pili lea na faatoa uma nei, o le aia tatau a tagata e toatele ma le aia tatau a le tagata e toatasi. O lea la ua fetaoai nei i i, ua taofiofia le aia tatau a le tagata e alu i le Palota, a ua aia mai le Pule mamalu a Alii ma Faipule e taofiofia mea ia i totonu o nuu ma afioaga. E na ona ou fai atu faapena lau Afioga i le Minisita o Faiga Palota. Ua uma ona ou apoapoai i si o matou aiga, aua le toia le va. Ia tausi le filemu, afai e finagalo o ai itumalo ma nuu latou te le talia, ave i lalo, tausi le filemu. Aua ne i o tatou faataumatatao, saili i lalo ia Malo. A o le agaga lena, ua matou le iloa nei po o fea le Tulafono o le a o e faataua. E

leaga o lea ua uma ona pasi le Tulafono o Faiga Palota, o mea ia e alu le sui usufono e fai. A o lea ua molimau atu nei, ua toe fai le isi Tulafono, e toe taofia ai le isi Tulafono. E fau le isi Tulafono e faaola ai, ae fau le isi Tulafono e lepetia ai, tuu atu i ou tafatafa.

O le isi itu e faanoanoa ai, ona e taulamua atu i inei i le Maota lenei le taofiofiga o a matou faalauiloa. E taulamua ai nisi o Minisita, e o e tafale nuu ma afioaga, e taofiofi mea ia. Lau Afioga i le Minisita e lagona le vaivai o le loto, leaga o i inei e afua ai manu ma le manuia o le Malo. E afua ai manu ma le filemu ma le saogalemu o le atunuu. Ae a fai loa ae tatou amata atu i inei le faavevesi o le atunuu, ona ou alofa lea i le tapuaiga a Samoa.

FOFOGA FETALAI: Ia malie le sui usufono mo Gagaifomauga Nu 3, se i tulai mai le Minisita o Faamasinoga ma Faiga Palota.

Afioga Hon Faaolesa Katopau T. Ainuu (Minisita mo Faamasinoga ma Pulega Tau Faamasinoga): O le mataupu e fia faamalamalama lau Afioga. E leai se mea e mafai ona fai i ai e le Ofisa o Faiga Palota i mea ia, pe a faapea o la e faasea mai le sui mamalu i le Ofisa o Faiga Palota ma le latou Tulafono. O Tulafono ia a le Ofisa o Faiga Palota, e mama le auala na fai ai, ae leai ni aiaiga foi l ea e o atu le Ofisa o Faiga Palota e faamalosia le latou Tulafono. O la ua tatala, ae tatala lava i tagata ma le latou faitalia. Ae le o i ai se agaga faapea ua tuu atu, e o atu le Ofisa o Faiga Palota e faamalosia a latou Tulafono. Ma le ava ma le faaaloalo.

Susuga Hon LAAULI POLATAIVAO LEUATEA: Lau Afioga i le Fofoga Fetalai, e pei lava ona ou tuituimalofie. Faaolesa, o le tuualalo lava ia o le tagi a le pumate. Ua uma ona fai lau Tulafono o mea ia e o sui tauva e fai, faalauiloa faapipii, talanoa. Ae o le a le mea lea ua tupu? Ua faaoga mai e le pule mamalu a Alii ma Faipule le aia toatele. O lea ou te tuualalo atu ai, ia toe silasila ma toe vaai po o fea e vase ai le laina o le mea lea. E na ona tuu atu i ou tafatafa, e tatalo foi i lo tatou Maota, se o i inei e alu atu ai le toa o le atunuu, o le maota lenei. A tatou toa ua toa tai ia Samoa. Ae a taulamusa atu loa i inei, ona tatou oo loa lea i puapuaga.

FOFOGA FETALAI: Ia malie le sui usufono mo Gagaifomauga Nu. 3, se i toe tulai mai le Minisita o Faamasinoga ma Faiga Palota.

Afioga Hon Faaolesa Katopau T. Ainuu: E pei lava o le mataupu lea e faasea ai le sui usufono mamalu, o le Tulafono foi ia e 3 lea faatoa pasia atu nei, e eseese Tulafono ia. O le Tulafono lava ia tau palota, o lea ua uma ona pasia, ua silafia foi e lau Afioga ma le mamalu o le Maota. O Tulafono ia e 3, lea faatoa pasia mulimuli atu nei, e le i oo mai le taimi e faamamaluina ai. A oo foi i le taimi e faamamaluina ai, o la e avanoa le Faamasinoga, tatou te

agai i ai. O le Faamasinoga na te faia le faaiuga mulimuli o feteenaiga ia e saunoa i ai le sui usufono. I le ava ma le faaaloalo.

FOFOGA FETALAI: Se i tau fesoasoani atu lava le Nofoa faamolemole sui usufono mamalu. E masalo o le vaega lea o le Tulafono, o le taimi foi la ua maea ona pasia ma faataoto mai le alafua, le taimi foi lenei e faalauiloa ai sui, le campaign. Ae le o le tulaga foi lenei e faapea campaign foi lea, ona o lea e tufa ia tupe. A o le mea foi lea o le faalauiloa lava e le sui ia, i lona itumalo. E pei e faapena, e pei o le tulaga lena. E masalo o le vailiu tonu lena o lea e saunoa mai ai le sui usufono mamalu.

Se i onosai mai lava se i tau faamaea atu lau...e masalo o le vailiu lea. O le tulaga lena o lea foi e i ai lona taimi tapulaa. O le taimi e amata ai ona faalauiloa lava e le sui ia ia ia, ma le taimi foi e faamuta ai, le tulaga lena. A o le isi, e pei o le tau faamaninoga lea o le vala lea. O le isi itu ou te fia fesoasoani atu ai i lau Afioga i le sui usufono mamalu, malo lava, e ese le manaia o le faafofoga mai a le atunuu i lau saunoaga. O malo lava e saili i lalo e faapena. E tatou te faamoemoe i le Atua e fesoasoani mai e tofofi mai i le lagi ia Taitai o Malo. E le gata i lea foi Vaega Faaupufai, HRPP o lo o faatautaia le Malo, ae faapea foi i nisi o Vaega Faaupufai, e pei ona tulai mai lau Afioga, e avea ma sao o le aiga o le FAST. Ae na ona ou faamanatu atu ona, o lea sa sau i lau saunoaga, ae ua e faafetai i le Afioga i le Sao Faapito o se taimi ona see atu lea e tuufaatasi ma la outou vaega, ia o le aia tatau a le Sao Faapito. E na ona faamanatu atu, ua maea ona lesitala ia le Sao Faapito i le tulaga foi lenei na lesitala ai o tatou sui, o se sui tutoatasi. E pei o le tulaga lena, e fai fuafua i ai foi lena itu. O le faaaliga lea ma le agaga faaaloalo.

Se i tuu atu lava le avanoa muamua i le Taitai o le Malo. Faamolemole lau Afioga i le sui mamalu Laauli...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ua matagofie foi lenei taeao fou, maleifua mai ma alafai mai le paia o le Maota nei. Ia faamalo foi i le sui usufono o saunoa nei. O si mea e fia faasao ma faamalamalama foi. E leai se Tulafono e pasia i totonu o le Maota lenei, e toe faavevesi ni afioaga. Ou te tau maua atu, e pe i ua aafia ai foi ma Tulafono ia tatou te le i talanoaina. E tasi lava le agaga o nei Tulafono, ia sologa lelei a tatou Faiga Palota. E pau lava lena o mea ia e fai nei.

A o le faalauiloa po o le faatosina lea, aua o le faatosina, lea e saunoa mai ai le sui usufono mamalu, e le fou lenei mea. Ua faafia ea ona fai a tatou faamasinoga i mea ia o faatosina. O le faatosina foi o le o talai i tua, e fou uma nei mea. E le faapena le tulaga e masani ai tatou, o le te i lava ua o faalauiloa i tua. Aua a oo ina...pe tulai mai foi nisi faamasinoga, pe a tuanei le tatou Faiga Palota, o aga lava ia o mea o faatosina. E oo foi i le tuu i luga

o laupapa nei faalauiloa, a o Pulega mamalu a alii ma faipule. E tasi lava le mea e agai i ai, e agai i le faatoafilemuina o le nonofo ai o tagata o le nuu ma le itumalo. Aua a vaaia loa se mea fou, e lagalaga manatu, o le a le mea ua faapea ai mea ia.

O le mea la lena, i le puipuiga ma le tausiga o le filemu, e masani ai alii ma faipule o nuu. E le o lou alu atu lava faatu lau laupapa i luga, e i ai foi mea o totogi o mea nei o laupapa. O laupapa uma lava ia e tu i le taulaga, e pei e tai \$500 ea. O totogi ni na mea? Aua e ono tapa foi e nuu, o lea foi ou te tau faalogo. O lea foi e ia i le fuafuaga a le Matagaluega e nafa tonu ma mea ia, e totogi foi o mea uma e tutu i luga o eleele a le Malo ma fale o le Malo. Lau Afioga i le Fofoga Fetalai, ne i te i ua te i lava ua saea fua le maaveave le fua, ona o ni tu ma aga, e o atu lava faamalosi. O tatou tu ma aganuu e fai i luga o le avafatafata. Ae le o lou alu atu lava tuu i luma o ou lumafale po o lou fanua, e te fesili lava i pulega mamalu a alii ma faipule. O le a le mea ua tutu ai mea ia i isi nuu, ae le tutu i isi nuu.

Lau Afioga o le mea lena, leaga o le tofa i alii ma faipule o le tofa e tausi ai le filemu lau Afioga i le Fofoga Fetalai. Ona te i lea ua afea fua Tulafono o le Maota, ua uma ona pasi. Lau Afioga i le Fofoga Fetalai, e pei o le tulaga lena. E i ai lava le taimi e ave ane ai le ta naunau, lo tatou naunau e fai le mea lea e te manao i ai, ona tuuai fua lea o le tofa mamao a alii ma faipule. E tasi lava le mea e agai i ai le Pulega mamalu a alii ma faipule o le tausiga o le filemu. E tatau lava ona fesili i le nuu, o le a la outou tofa? Ia ma totogi foi se mea i le nuu. E le faapea e faatu i luma o lou lumafale, ona faapea lea e te pule ai lava. E leai, o aga na faale-nuu, e le faapea e tu atu lava oe fai lau aia tatau toatasi. E tatau i alii ma faipule ona faaoga le tofa mamao, e puipuia ai le filemu. Aua a tuufau loa, e toe apaapa atu, ua ese mea e tulai mai i totonu o le nuu.

Lau Afioga i le Fofoga Fetalai, o le tau faamalamalama atu lena, o lea foi e tau matau atu le saunoaga a le sui usufono. Ia faafetai, faafetai i lou apaapa mai i le moa o le auala mo le tausiga o le filemu. A o lea lava toetiiti e toe sipa ese.

FOFOGA FETALAI: Ia malie le sui usufono, se i tulai mai le sui usufono o Salega Sasae.

Tofa Olo Fiti Afoa Vaai (Salega Sasae): E faafetai tele lava mo le avanoa. E leai o lea sa ou faalogologo lava ma le totoa i le tulaga lea o le Tulafono e pei ona fesiligia e le sui mamalu. I le vaega lea o lo o manino i totonu o le Tulafono, le ao ma le tatau ona fai faailoilo ia ma faalauiloa le sui mamalu, e so o se isi lava, so o se sui mamalu lava. A o lea e matau atu i le saunoaga a le Afioga i le Minisita, e le o se latou matafaioi le faamalosi o lea Tulafono. Ua ou le iloa la pe o le a le mea na fai ai le Tulafono pe a fai e le mafai ona faamalosi ma fai ni auala e faamalosi ai Tulafono ia na pasi atu

i i. Ma ou te talitonu foi la, o le ala foi lena, e pei ua le ano mai ai ia le pule mamalu a alii ma faipule. Ona o lea na saunoa le Minisita, e le faamalosia, e le iloa la e au po o a Tulafono e faamalosia, a o a Tulafono e le faamalosia. Ma le agaga faaaloalo.

FOFOGA FETALAI: Ia toe tulai mai le Minisita o Faamasinoga ma Faiga Palota.

Afioga Hon Faaolesa Katopau T. Ainuu: Se i faitau faalelei le Tulafono. O la lava e manino i totonu o le Tulafono, o avanoa ia e tuu atu i sui taitasi e fai a latou faalauiloa, ae le o fai atu e tatau ona faalauiloa. O ai la e alu e savali e faamautinoa ua fai faalauiloa a sui mamalu o le Maota lenei. E leai se faaupuga faapena o i ai i totonu o le Tulafono.

FOFOGA FETALAI: Ia malie lava le sui usufono mo Gagaifomauga Nu 3, se i toe tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ou te fia faasaoa ia le Minisita. Ua silasila mai e oo lava ia te au ou te faasaoa lau Minisita. O lou fia faasaoa o lau Minisita, o le upu lea o le faalauiloa. Lau Afioga i le Minisita, o mea na e fai i fafo, i le miliona ma miliona o tagata e le iloa oe. Ae e te le faalauiloaina oe i lou nuu, o la e iloa oe e lou nuu. Lau Afioga o le sese lena o le Minisita, e te le alu oe faalauiloa i ia komiti sei vagana o oe o le sui sa e tafao i le taulaga, e le iloa oe e nuu. Ona tau faalauiloa lea, e alu atu faapipii au laupapa i luga o le niu, i luga o le kava, ia o tagata i uta matamata ai. A o i inei lava i Samoa, e le tau faalauiloa, o la lava e iloa e le nuu ia o latou tagata. E pei o lau faasaoga lena lau Afioga.

Susuga Hon LAAULI POLATAIVAO LEUATEA: Ua lava ia lea lau Afioga i le Fofoga Fetalai, na ona ou faaila ma ou faamanino. Samoa ia outou manino, e pau lava lea. Aua o nei mea o billboards e le o ni mea fou, ua leva lava ona alu i luga billboards a nisi. O le Tulafono foi a le tatou Palota na uma atu nei ma isi Nofoaiga ua uma atu. Ae na ou faafetai i le Minisita, i lana Tulafono o auala ia faatoa alu ai se tagata faatoa amata ona savali, i le sitepu muamua e fai lana faalauiloa. E ui i lea, Honorable Minister, o lea ua ou fai atu, e le taugofie, na lelei, 16 itumalo na matou i ai, e leai ma se pisa. Ae na saunoa loa le Palemia i le TV, o ifo i ai, o ifo i ai e fai ni tou fesili ma o e osofai. O lea la ua tupu nei le mea lea. Lau Afioga i le Fofoga Fetalai, o ia lea na tupu ai le faalavelave.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O lau faasilasilaga i la matou lava vaega, o i ai e aloaia si vaega. O la e o atu ma tupe ma taumafa, se o ifo e taumamafa ma tapa ni outou lafo. O le vaega lea o le matua tele o le seleni. O ai le vale e nofonofo i le fale, o lea ua tufa atu ia faatosina tau tupe ma tau meaai. O le ala lena, o lea e faamaumau uma lava e le matou vaega a outou mea ia e fai. Ne i te i ua galo ia te outou, ia le tulaga lena, a o lalo o le tatou Tulafono lea tatou te le i oo i ai. O lea e faamanino uma ai lava mea uma. E manatua foi, o le faaiuga o le tatou Fonotaga, a uma a outou saunoaga, vaai o lea ua tuufau lava a outou saunoaga, ua leva ona ou fia tulai atu e taofi saunoaga ma lau Kapeneta. Se a o le ava, e faigata tele le avafatafata. Ae a oo loa i le matou taimi, ia outou alolofa ia aua foi ne i outou faalavelave mai. Ia tai 2 aso e saunoa ai le Minisita, e faamalamalama mea uma. Lau Afioga i le Fofoga Fetalai, o lea tatou te le i oo i Tulafono, o Tulafono ia e toe faamanino ai, mea la ia e saunoa mai ai sui usufono. Ona o lea ua tutulai mai e pei ua saf i Tulafono, o lea la o le a toe faamanino. Leaga e i ai mea na tutupu i faamasinoga ia na uma atu nei, e i ai nai mea la e faale o manino i le malamalamaga o se tasi po o se toa-lua o faamasino, e manino lelei i tatou felafolafoaiga.

E manatua foi e lau Afioga i le Fofoga Fetalai, o tatou e fausia Tulafono, e faavae ai galuega a faamasino ma loaia. E saili ai a latou pau falaoa, a pasi atu le Tulafono iinei, ona faauiga lea o le Tulafono po o le a tonu lava le finagalo, lea e molimoli atu i totonu o le Maota lenei. E le o faalogologo mai la faamasino, o la e fai a latou galuega, a o lea e tatou te talanoa i Tulafono ma uiga o le Tulafono. E faamatala ona toe ave foi lea i o i le Komiti ma toe auai atu i ai i latou e fai ni a latou molimau, ae sei vagana foi le Tulafono ua manaomia le pasia. Ona pau lava lana ia mea, o le toe faamanino atili. Ae e i ai la taimi, e nunumi pe faataga nunumi ai foi le isi faamasino, sa tatau la ona tilotilo i Hansard e malamalama ai a tatou felafolafoaiga ia e fai e faamatala atu ai le Tulafono. Ae i ai foi le taimi, e le fia tilotilo foi i ai se faamasino i Hansard ma atili ai lea ona pogisa, ma fai pogisa ai ana faaiuga. O lea la, o le agaga lea o le tatou Tulafono lea e toeitiiti nei oo i ai le tatou faatalanoaga, toe faamanino ai mea ia, ina ne i te i ua i ai ni faamasinoga, i tua atu o le tatou Faiga Palota e faatatau i faatosina ia na fai i Faiga Palota, ona lagalaga ai lea o mataupu ina ia manino lelei ma leai ai se isi e toe taumatemate i nei mea o billboards ma mea faapena ma le tulaga e tatau ona faaoga i ai.

Lau Afioga na o se faataitaiga. Lau Afioga i le Fofoga Fetalai, o le faataitaiga lena.

FOFOGA FETALAI: Tulai mai le sui usufono.

Susuga Hon LAAULI POLATAIVAO LEUATEA: Faafetai tele lava i le faamalamalama, ua matua manino mea uma. Na matou o i Vaimoso lau Afioga i le Fofoga Fetalai, na matou feiloai ai ma sui usufono o le HRPP. Talu ona uma le saunoaga a le Palemia o atu loa sui tauva o le HRPP, oka se manaia o le matou faasoa. Ioe. O le agaga fiafia lea, o auga ia o aute. Leaga foi e ese lava mea ia e faalele atu iinei ese ina ua militino. Ou fai atu, aumai ni a outou fesili, e i ai se mea tou te fia malamalama ai i le matou anavatau, lau uma le anavatau, a o lea e faapea mai o lea tou te o e pepelo le atunuu ma faaoleole le atunuu ma fai uma mea na.

Ae e te iloa le fesili muamua na fai mai? O le a le mea ua le fai ai se suesuega o le misela? Ioe. Ia, matou tali foi lea. A o le mea mulimuli lau Afioga, na sau le sui usufono o le HRPP tai le matou sua...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea e fia faasao.

FOFOGA FETALAI: Malie le sui usufono o lo o saunoa...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ia manatua foi o le mea lea o le suesuega o le misela o lea ua leva ona taoto i le Palemene lipoti, faamatala uma ai lava mea uma. E faapea le tele o le lipoti, ae le i faitau ai lava Laauli. A o le fesili foi lea, o le fesili na faaoso e Laauli.

Susuga Hon LAAULI POLATAIVAO LEUATEA: O le tala fiafia lau Afioga i le Fofoga Fetalai, na uma ane alu le sui usufono tapena mai le matou faatamalii. Oka, se mafutaga ina a lelei. Ia na fai foi lea o le matou faaaloalo, fai lona pasese ma tai foi lana sua. Ia se i fetuunai ifo po o le a le Tulafono lea ua soli i le avafatafata, lea foi tatou te talanoa ai i i, tuu le Tulafono ae fai le avafatafata.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai se mea e tau lau mai ai fua ia mea, o le faatosina ia ua alu alu. O le a la le mea e toe talanoa ai?

Susuga Hon LAAULI POLATAIVAO LEUATEA: A o le upu mulimuli a le sui usufono, "Se Laauli ua ou salamo." Ou fai atu, afai e alofa le HRPP ia oe, omai e fai ni savali faapea. Ae faafetai i le afio mai o lena tamalii, o la e mafaufau lelei i le taimi lenei. Ou te manatu e nonofo uma ae faasau le sui a le FAST.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le mea e fia faasao, manatua foi o i sa alaala ai Mulitalo, a. A o faatosina foi faapea lea na lagalaga i totonu o le Faamasinoga. O le mea lena ou te faaeteete tele i ai, aua e tilotilo Faamasino, o a ia mea fou ua fai? Lau Afioga i le Fofoga Fetalai, ae tau ina give notice, give notice. So o se faatosina lava e fou, e lololo tele i le taimi o Faamasinoga.

Susuga Hon LAAULI POLATAIVAO LEUATEA: Ia, ua lava ia lea lau Afioga i le Fofoga Fetalai.

FOFOGA FETALAI: Ioe, see ese maia...

Susuga Hon LAAULI POLATAIVAO LEUATEA: E leai se eseesega o le matou mea lea e fai ma a outou talaga auala na e fai, e tutusa lelei.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

Susuga Hon LAAULI POLATAIVAO LEUATEA: Aumai avatu, faalauiloa faaaoga mea a le Malo e promote ai tulaga faapea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le tala lea ou te fai atu nei, o se mea uiga ese e fou, a o le tatalaina ia o auala, o le tatou polokalame na amata mai lava i le 1962 o fai auala. Lau Afioga i le Fofoga Fetalai, e le o se mea fou. Ae so o se faatosina fou lava e te i ai le mafaufau.

Susuga Hon LAAULI POLATAIVAO LEUATEA: Ia, ua lava ia, o lea o le a ou see ese. Faamasino outou Samoa. A o itumalo matou te le i o atu, faatali mai o le a matou o atu.

Lau Afioga i le Minisita o Leipa ma...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai, e lelei lava le fetalai, a. Aua tasi lena sui usufono e maualalo i le isi minute ae maualuga i le isi minute. Ia o lea foi la ua fai matilatila lava e tau mai ai, e le kea i ni Tulafono o Faatosina.

Susuga Hon LAAULI POLATAIVAO LEUATEA: Fai mai le tuualalo a tama faaleagaga, Laauli, saili i lalo malo. O lau lauga mulimuli ia taialalo

le ia a Sa Saumani. E te manumalo i le saili i lalo o malo, tuu pea e tavalusi mai, tuu pea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le Taitai i le Taitai. Tusa o le taimi la leni o lea ua suamalie upu. Na amata lau lauga o e usitai i le faifeau lena na tuualalo ia te oe, a o lea ua e faaiu puka i le maualuga.

Susuga Hon LAAULI POLATAIVAO LEUATEA: Ia, o lau lava lena faamasinoga, e molimau le Maota, molimau le atunuu.

Lau Afioga Lautafi, se toe vaai ifo lava i le mea leni o le daylight savings se faamolemole, ua tele nai matua ua fai mai i le mea leni o le usupo o tamaiti i le taeao, aemaise lava Savaii i le mamao o auala ma mea. Se i toe silasila ifo lava, ua i ai aafiaga aemaise lava fanau teine e savavali i le vaveao ma mea ia e tutupu. Na ona tuu atu i ou tafatafa lau Afioga e te silasila mamao i ai, ua tele nai aiga ua fautua mai.

Lau Afioga i le Minisita mo Faasalalauga, tasi lea pito e sili ona mataitu i le taimi leni, o le faaogaina lea o le afaigaluega a le Malo ma alaleo a le Malo e fai ai mea a le Vaega Faaupufai ma faasalalau ai, ua oo lava i le afaigaluega a le Malo i le Savali ma le 2AP, ia, ua amata ona sau le agaga lea e sau. O ai ea matou te faia... o fea ea le mea e faimalo ai matou? O le tatou Malo, o a tatou meatotino, o a tatou alaleo faasalalau...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o le mea e fia faasao.

FOFOGA FETALAI: Ia, malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga, o la e matala le Savali. Sa faitioina ai le au faasalalau nei i le omai ia te au, faitio ai le TV3 faitio ai le TV1. Ae manatua foi lau Afioga i le Fofoga Fetalai, o le 2010 ia Mati 2011, ua toe o ni aso fai le faiga palota, na savalivali mai ai, o le uluai taimi lava lea na savalivali mai ai le 2AP e fia faatalanoa au ua leai ni a latou news. Ia, a o nisi o mataupu, o ni a latou fesili e fia fesili mai ai i le faiga palota o le 2011. O au la na ou manatu, e uma lava ma uma ai, aua e tele foi lou pisi, ae te i ua 2 vaiaso na sosoo ai, ae toe omai foi le 2AP e fia saili mai ni nai tala o mea nei o atinae. Ia, e manatua foi la, o lea matou te i ai i ma le Afioga ia Laauli, e fiafia lava e faalogologo i mea ia Laauli i se auala e faalautele atu ai atinae a le Malo. O le mea lena lea na omai ai, o atinae. Ona alu alu lea, e vaai mai le TV1, e pei ua fiafia tagata lau Afioga i le Fofoga

Fetalai e faalogologo i le 2AP ona o lea ua aumai tonu lava fesili ma ou faamalamalamaina atu. O lea e nonofo atu Minisita. Ua ou fiu foi e fai i Minisita, se a maua le avanoa o outou e faatalanoa, e faapena foi Ofisa Sili o Pulega o Matagaluega. O lea foi e ee mai le Afioga i le Sao Faapito, o lau foi lena tuualalo i Ofisa Sili o Pulega o Matagaluega, se a o atu le media tali outou i ai. Ae i ai le faafitauli, e i ai isi ituaiga media, a avatu le fesili ae tali mai i le faasalalauga lava lea e tasi e sau ai le tali, ae toe tutui mai i a latou foi faasalalauga.

O Ofisa Sili o Pulega foi o Matagaluega latou, e le o ni agelu. Na o le pau le mea o le oso ane lava o le ita, e toe alu atu loa lava, e leai se mea, e le o avanoa, e le o avanoa. Ou te fiu lava la e augani atu ia latou e alu le latou... A fesili atu le media, tali. A o lea la ua maua ai au i le tulimanu, aua foi ou te i ai lava i totonu i lou ofisa i so o se taimi. O le ala lena e tapuni ai lou ofisa i isi aso ua tea le 6 tea le 7, ae ou te alu atu foi i le fale o la e foi ua tuu mai ai, ona o au, ou te tuuavanoa i tagata. Sau loa ma le TV1, matou te mananao foi matou. Ia, o lau tala, “O le a le mea tou te le pueina ai au faasalalauga ona fai ai lea o tou faasalalauga?” Fai mai, leaga o le TV matou te mananao lava ina ia sau sao ia te oe. Ua uma atu le TV1, ae omai foi le TV3 ia, sau ma fafo. O la e i ai le isi tamalii i le taimi lenei o la e foi e manao e interview au. Ou fai atu, “Sole, e le faapea e faigofie le mea lena, aua e tatau ona ou faitau foi au i mataupu tou te fai mai ai.” Ou fai atu, se o ane... o lau tautalaga lava lea e tasi, o mea lava na na tou te fia talanoa mai ai. Ae manao lava latou e tatau ona aumai se latou fesili tuusao.

Lau Afioga i le Fofoga Fetalai, e i ai le taimi na ou otegiaina ai le 2AP ma le Savali, o le a le mea tou te le o ai i o? O invite mai outou? Fai mai, invite mai, talia pe a omai. Ae fai mai la le vaega, “Na matou o i ai, a o le otegiaga leaga o matou e Laauli, pe tasi lava le latou vaai o lea e o atu, ae pei o le vaai a le taitai i si tama lea e alu atu i le wheelchair, o le matua vaai mauualalo ma le anoano o upu malolosi na lau i ai. Ia o nei foi tagata e le o ni agelu. Ia o le a fai la ia ai, o ni aga a ai? O au a aga. Lau Afioga i le Fofoga Fetalai, o lou augofie e tali tagata e omai, o le ala lena lea e omai ai, ae pei ua tuuaia ai au. O au tali foi, lau Afioga i le Fofoga Fetalai, ou te le o usu. O le a le uiga o lea mea ou te le o usu? Ou te le o amatamea. E ala ona ou tali, o a outou tuuaiga leaga lava lea e fai i le Malo, lea e fai i fafo, piki mai lea e fafo, tuu ane i a latou sui ia e i inei, ona omai loa lea tui au i fesili. Ae a au le talia, ona a lea? Ona tuuaia loa lea o le Malo lona uiga e sao tuuaiga ia e fai mai.

Lau Afioga i le Fofoga Fetalai, o au la lea e tali, ou te le o usu. A o a upu ia e fai? O lea ou te faaleaga outou. Ou te le o faaleaga outou, o lea ou te tali atu i tou mataupu ia e ave i fafo ae toe piki e tagata i fafo, logo mai le media, lea e mafua ai ona latou aumai le fesili ia te au. O le a la le mea e fai e au? E tatau ona ou tali ma faamama le Malo i tuuaiga matuia ia e lafo mai i le Malo.

Lau Afioga i le Fofoga Fetalai, pau lava lena o lau mea lea e fai, ou te le o dominate ina po o ou faatonuina i latou uma nei e fai na o le Malo, o la e open. Na molia foi le Malo i le taimi o le Tootooalii i le lafoga na fai e le Tootooalii i totonu i i, na faapea le Tootooalii, “Tupua, e tatau ona e sau muamua ia te au se i ou pasia muamua au mea, leaga o oe le isi tagata faaleaga tagata, faavevesi Malo.” Faafogafoga mai Tupua, o upu na o lea e tusia i totonu o le tatou Hansard, ae na molia ai le Palemia e le Taitai o le Itu Agai. E molia le Malo a ua tuumalo Tofilau, ona ou alu atu loa lea e talitali le maemaea o le Taitai o le Itu Agai i le taimi lena. Tuu mai le fesili lena ona ou tali lea, “E i ai le tulaga e le o manino, ona o totonu o le Hansard, o a tatou faasalalaua na lafo ai le upu lena a Tofilau, ona ata ai lea o Tupua, e ata lava ma ave lana upu ma talie matou i lena taimi.” O le a le uiga o lea mea? o lona uiga, o le tali ata atu o Tofilau, na o se mea malie, ae le faia e le Toeaina le mea lena, o lena lava e avanoa le o o outou e o i le 2AP. Na laga le mataupu lena i totonu o le Faamasinoga aumai ia te au, molitu ai sa i ai le Tama a Aiga i le taeao lena, molitu ai lenei Toeaina a o lea ua tuumalo, tusa ua 6 masina talu ona tuumalo. Ona ou tali lea, e i ai le mea lena e misi i ina. Ona talie ai lea... e kiliva le saunoaga lena, o le saunoaga faa-suaga i totonu o le Maota lenei ma ata Tofilau ma talie le Maota, ae le o sau la i totonu o faasilasilaga ia o a tatou records, e le o i ai se vaega, ona talie ai lea o le Maota. A na i ai upu na, a, semeamanu e faamaonia ai i ina o le upu a le Taitai, na o se mea e talie ai ae le o se mea e faamaonia. Ia ona fesili mai loa lea, o fai la se tou faiga faapea? O lau tali, “E leai, e leai se faiga faapena.” O le taeao na ou Palemia ai, na ou aamia uma ai lava le Savali, aami le Savali, aami le 2AP, so o se isi lava o le Itu Agai po o ai e fia faasalalau ni ona finagalo, talia. Ae ou te le fai atu ia te outou, o lena tou te iloa le mea e tatau ma le mea e le tatau, o outou o professionals i la outou foi matafaioi. Pule outou i mea a tagata e fia faasalalau.

Lau Afioga i le Fofoga Fetalai, o le iuga lena o le Faamasinoga, e le o aafia le Malo lenei i ni faiga faapena. E lelei la ona ou fautua oe, tapa sau iuga mai le Faamasinoga ona e silafia ai lea o mea tonu, ae aua e te faalogologo tala. O lou faalogologo tala mai le tama lena o Faumui ma le tama lea o Olo e taitaiseseina ai lau Afioga. Ia, o le faamatalaga lea lau Afioga...

Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Lau Afioga i le Fofoga Fetalai...

Susuga Hon LAAULI POLATAIVAO LEUATEA: Malo faafetai i lau Afioga. Ia o lea ua manino le malamalama. Ia o lea lava e fetuunai le Taitai i le Taitai, e lelei lava lea ona manino lea. Aua ne i i ai se isi e osovale, Taitai i le Taitai ona manino lea o le mataupu. A saunoa le Palemia, o le ma va lena.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea la ua manino. Lau Afioga, o lea ua manino leaga o lea na saunoa le tou vaega, na saunoa manino lava Faumuina aua o lea e le i alu atu Fiamē, e alu outou i le matua. O ia la e Taitai, a le i ai, ona Taitai lea o Olo, a o oe e te aupito laitiiti o latou e toa-tolu, seiloga la e le avanoa laua, ona faatoa e Taitai lea. Ae talu ai la o lea ou te vaai atu e Taitai uma lava outou e toa-tolu, o le ala lena na ou faalupe atu ai lau Afioga i le Taitai, a o lea la ua ou iloa, sole, oulua ia, aua e te lua toe le faaaloalo i le tou Taitai o Laauli.

Tofa Olo Fiti Afoa Vaai: Lau Afioga i le Fofoga Fetalai, o lea e misi i le Palemene le mea lea, 'ona toe ai lea o le Palemene'.

FOFOGA FETALAI: Malie Olo, ia, o lea ou te tau fai atu ai, ioe. Ona toe ai lea o le Palemene ma faataatiaese Galuega mo lana malologa.

Ia, o le a faamau lava mea na, ma se i... o le a avea foi le malologa ma mea o le a saili ai po o ai le Taitai moni.

Na faataatiaese Taulumaga a le Fono Aoao Faitulafono mo lana malologa masani i le itula e 10:40 i le taeao ma toe faaauau i le itula e 11:34 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Taulumaga a le Fono Aoao Faitulafono.

Ia, ua manatu ua maua foi le faasiliga malosi e le paia o sui usufono mamalu e faaauau ai le tatou galuega. E faia le tatou malologa o faapena ona saunoa le Afioga i le sui usufono mamalu mo Gagaifomauga Nu.3.

Ia, ou te tapa le Afioga i le sui usufono mamalu e faaauau le saunoaga, ae fai fuafua mai ua maea lou taimi foi lenei vagana o le taimi lavea la lea e faaoga. Tulai mai le sui usufono mamalu.

Susuga Hon LAAULI POLATAIVAO LEUATEA: Faafetai faafetai lava le faaaloalo. Lau Afioga i le Fofoga Fetalai...

FOFOGA FETALAI: Malie lau Afioga i le Fofoga Fetalai se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua ou matau atu o lea ua foliga mai ua agai ina maea le taimi o le Afioga i le sui usufono, ae o lea foi ou te toe matau atu ua tulaga ese foi lenei taeao i le agiagi mai a le Afioga i le sui usufono. Ou te taofi ai lau Afioga, ni a fa ae faamaea lelei mai le saunoaga ua matagofie foi i le matou faalogologo atu. O nai minute avea ia na pei e foliga e faalavelave i le saunoaga ale sui usufono, o mea lava e le maalofia, o mea e faamalamalama. Ae manatu ua matagofie lava le faalogologo atu, se i maea lelei saunoaga ma tapenaga a le Afioga i le sui usufono mo Gagaifomauga Nu.3. E pei o le faaoolomaau lena i lau Afioga.

FOFOGA FETALAI: Malo faafetai. Ia, ona o lea ua tulai mai lau Afioga i le Palemia e talosagaina ina ia faapena ona faamaea le tapenaga a le Afioga i le sui usufono mo Gagaifomauga Nu.3 lau Afioga Laauli. Ia, e i ai le manatu o le Nofoa, o le a faapena foi ona faimea faalogo i ai le Nofoa. Atonu o la e foi ua faafofoga mai le Afioga i le sui usufono mamalu, ia na o mea anoa ina ia talafeagai ma le tatou taimi e faauma ai le tulaga o le saunoaga. Tulai mai lau Afioga i le sui usufono mamalu lau Afioga Laauli.

Susuga Hon LAAULI POLATAIVAO LEUATEA: Faafetai. O faiva o pule o faiva o faaaloalo aua e le tau sulaina lau Afioga i le Fofoga Fetalai. Faafetai i lau Afioga i le Taitai o le Malo, o le a fai lava le upu e fai e le tulafale, faafetai le alofa, faafetai le agalelei, aemaise foi le faaaloalo a lau Afioga i le Fofoga Fetalai.

E manatu o lea ua pale auau le taliga o le sua, ua maua le faatiliga malosi e le tatou Palemene e faaaau ai foi le toe tautalaga a lenei itumalo. O le agaga lava lea lau Afioga i le Fofoga Fetalai e pei ona ou fai atu i le taimi ua sola, o moomooga alofa lava e valuvalusia ai aa o le fau, aa o le laau, aemaise foi o le tatatuli i le faafofoga a le Taitai o le Malo e matimati ai nai toe taimi o le tatou mafutaga.

Lau Afioga i le Minisita mo Leoleo ma Falepuipui, i le tulaga lea o le tatou Liquor Board, e toe avatu pea le tuualalo lea. O faamaumauga a leoleo, e 3,000+ faalavelave matautia, auala televavave, fasioti tagata, sauaina o tina ma tamaiti, taavale, ona o le ava malosi. E toe tuu atu pea i ou tafatafa lau Afioga i le Minisita. Ua tele ma anoanoai lipoti a leoleo ua tuuaia ai lava vodkas nei sa avatu ai foi le tuualalo muamua. O lea foi ua toe vaaia i luga o fata, ae ese labels. It's dangers and it's poison mo le atunuu, o lea ua ou fai atu, e toe avatu i ou tafatafa lau Afioga. E faataaloga i vai le mea lea na ona palu lava ma ave i luga o fata, ae o le tele o le aafiaga mo le soifua maloloina o le atunuu. O la e foi e faamauina i uta i le Samoa Victim Support, e 3,500 cases o le mea lava lenei o le domestic violence ma le sauaina o tina. Faamolemole lau Afioga i le Minisita, se i e silasila ifo.

Faafetai tele mo le galuega lea ua fai i tua i nuu ia e lau mai ai fualaa faasaina, faafetai i leoleo, faafetai e leai se isi o afaina. Ae vaai le aisa lea e nonofo i talaane o leoleo, vaai le aisa lea e nonofo i talaane o le taulaga lea e saunoa i ai le Palemia i le matautia foi o lenei fualaa faasaina. E leai lava se case ua ta vaai atu ua toso mai se tagata o lo o latou paluina mea ia i le atunuu. E avatu Honorable, avatu i ou tafatafa e te silasila totoa i ai.

I le tulaga o le faamoemoe, ia e faapena se lagona. Lau Afioga i le Minisita o Tupe, e avatu lava le agaga, e pei ona ou fai atu i le amataga, o tatou faiga faavae ma faiga e limataitaiina ai le Matagaluega o Tupe, e taua tele lau polo faasoa aemaise foi o le auuaiga i luga i le taimi lenei. E matau foi ma le totoa. Tulou lava lau Afioga i le Fofoga Fetalai, o ou lava ia manatu. O le faasologa o le tatou Fono i le mea lea e alu ai, o lea o le a savali le 3 vaiaso. E le aiaina foi le finagalo o le Maota ma mea uma. Ae a faaopoopo uma tupe alu nei e alu i le taimi lenei, lau Afioga i le Minisita o Tupe, toe silasila ifo. O le avega o lea o le a toe faaopoopo a o lenei tatou te feagai ma le faamai ma le utiuti o le faasoa.

O le tatou Tala Autu o le Tupe, e \$116milion a le tupe pau lea e faatupe ai mea ia. Ae matau ifo i lau matau, e le i lalo ifo o le \$10,000 i le \$15,000 le cost mo tatou, i le taimi, totogi le afaigaluega a le Malo o lo o aafia. Na ona avatu faapena i ou tafatafa. E pei foi ona ou fai atu i le taimi ua sola i faiga faavae, ia o lona e i ina le tofa ona o le taimi lenei, o lea foi tatou te talanoa lava ma faasoa i le tulaga o lea e tuuaia ai foi lenei Itu faapea ua alu le matou savaliga ma tufa tupe. Ia, o lea foi matou te faamalamalama atu le tulaga o le aganuu ma le faa-Samoa, e taunuu loa omai matai ma ava, o le avasoa ma le avasuu, e le mafai ona tuua mea na. A i ai foi se tali, e tali lava i luga o le taumafataga.

Tulou lava le Falefia ma le Falesalafai, a o le tulaga lea lau Afioga i le Minisita o Tupe ua ou tapa ai le tulaga, po ua sui faiga faavae a le tatou Malo i le usugafono lea a Fiu Loimata lea na uma nei. Na ou matamata i luga o le upega o faamatalaga, ua agai le tatou Malo e ave le tupe lea e \$10,000 mo le maliu. Ia a o faiga faavae a ou te iloa, o le tagata nai totonu o le Palemene ae maliu, e \$3,000. O le Minisita, e \$5,000 a o lea ua ou matau, e \$10,000 le tupe lea na ave.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua fai si leva ona faatulaga mea ia mai le taimi o Tofilau e tau mai i le taimi lenei. E i ai foi la le agaga e alofa i le aiga e tulai mai ai mea ia. E faapena le igoa o le uta fetalai. Aua o le agaga lava ia, o le faaaloalo lea e ave i so o se faipule ua tuumalo, aua e fiu lava e taofi. O lea faatoa uma atu nei lava ona e saunoa i le tulaga o tu ma aganuu a Samoa. O mea ia ua leva,

sa fai foi i o tatou taimi. Ioe. A o faaaloaloga na e ave ia i latou o le aiga, o le vaega atoa lava lea o le fesoasoani a le Malo, o le faaaloalo, o le tulai o leoleo. E seasea tupu le mea lea o le maliu o se faipule, o le tulai o leoleo, tatala le tagavai. O le faaaloalo e ave i e ua tataui i ai le faaaloalo. A oo foi la ina e tumalo oe, e faapena foi ona fai.

Lau Afioga i le Fofoga Fetalai, o mea na e fai e Malo. O atunuu i fafo na o le fu'a, a o tatou e i ai foi le agaifanua, ona o le mea lena e fai alofa i le aiga aua e avatu foi i le aiga ae toe nonofo foi le aiga ma toe aumai le faaaloalo i e auai. Ia lea sa tatou auai. Ia, e mataga tele le tai atu o lau sua ae e toe nofo ma toe faafoi mai. A o le mea ou te fiafia i ai, na avatu lava e talia tou o ese loa.

Lau Afioga i le Fofoga Fetalai, o tulaga lena aua e le faapea e tatou te o atu na o laau mea la e tu mai i o, o tagata e tali maia le Malo e o atu e fai le sauniga i luga o le tuugamau. E le o ni mea fou lau Afioga i le Fofoga Fetalai. Ia, o le tali atu lena.

Susuga Hon LAAULI POLATAIVAO LEUATEA: Faafetai i lau Afioga. Ia e leai lava se agaga e fai se faafinauga. Na ala ona ou fesiligia, o le maliu lea na uma nei o le Tofa a Pau Sefo Pau, e \$5,000 le meaaloa a le Malo, o le ala lea o lou taua. E faapena foi faipule ua malolo a ua maliliu, ua uma ona fai le faiga faavae e \$3,000. A o le mea lena na ala ai ona ou fesiligia le ave o le \$10,000.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e faapena ona fetuunai. O le a le upu? O le tofa fetalai ma le tofa fetuunai, o le uta lena a le poto, a o le uta a le vale, e taofiofi mamau. Lau Afioga i le Fofoga Fetalai, o le tulaga lena. A o le mea ou te faanoanoa ai, o lou aumaia aloaia i totonu o le Maota le faaaloalo e ave i le la uso sa i totonu o le Palemene lena ma fai lona sao. I le taimi a o matou i ai ma lou tuua. Lau Afioga i le Fofoga Fetalai, sa ou le manatu e faitioina mea ia. O faaaloalo e ave i tagata ua maliliu, o tagata sa tautua i totonu o le Maota lena. O i ina ua ou toe faitioina ai le tofa lena e ia te oe. Lau Afioga i le Fofoga Fetalai, sa ou le manatu e te faitioina, le tutulai o le Malo i se uso a faipule ua tuua le Malo sa tautua i inei. E pau ia o mea e ave i ai le faaaloalo a lo tatou Malo. Lau Afioga i le Fofoga Fetalai, e aofia ai foi ma i latou, o lea ua ave i ai le faaaloalo e pei o Faauluuluga o Ekalesia. E pei o i latou ua aloaia e le Malo, i ni faaaloaloga po o ni mea maoae ua latou faia, e taulelei ai le atunuu lena. Lau Afioga i le Fofoga Fetalai, sa ou le manatu e te oo i ai. Ia se i e oo mai oe i i, ia ona fai lea o ni au faiga faapena. A o lea e mulimuli lava le Malo lena, i le mea na faataoto mai, e tatou tuua ua tuana'i atu.

Lau Afioga i le Fofoga Fetalai, o le fesoasoani atu lena i le sui usufono.

Susuga Hon LAAULI POLATAIVAO LEUATEA: Lau Afioga, e leai lava se agaga e...

Afioga Hon Loau Sola Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, e fia faaopoopo i le faamalamalamagaa le Malo i le tulaga....

FOFOGA FETALAI: Ia malie le sui usufono Laauli se i tulai mai le Minisita o Aoga.

Afioga Hon Loau Sola Keneti Sio: Ona e i ai le saunoaga e pei ona opea nei i le Maota. Ona e talu ai o le tele o tulaga faapea, o au lava e tele ina alu e momoli le fofoga aua lo tatou Malo. O lea la ou te faalogo atu o lea e faapea mai le sui usufono. Ona o lea foi e te i mai Laauli, ona e pau lea o se maliu ua auai, ae te i ai i le fuainumera lea o le 10. Ae ua fai si leva ona sui le Faiga Faavae lea i le sui usufono e maliu, o lea ua sii atu i luga i le \$10,000. Ae le na o le sui usufono lea ua tuua ai nei le Malo talu ai nei, ua feololo pe ua 3 ea pe ua 4 sui usufono ua faapena ona aafia i le tulaga lea. Mo le faamalamalamaina e le fou la.

Susuga Hon LAAULI POLATAIVAO LEUATEA: Ua faafetai, o lea ua manino le faaopoopo mai.

FOFOGA FETALAI: Ua i ai le manatu, Laauli, ou te talosagaina ina ia e see ese mai i lea tulaga. E faigata o la e faafofoga mai nai o tatou itumalo, aemaise o aiga o nai o tatou uso sa tatou galulue faatasi, ae pei ua o tatou toe taua ia mea. Ia e lagona foi le matamuli. A oo loa i le tulaga faapea, ua leo laititi foi le tamaitai Paia e pei o le upu e fai i Salafai. Ua le nanea foi se tatou mea na fai, pe afai tatou te toe foi i tua ma taua. Ae malie le sui usufono, see ese ia...

Susuga Hon LAAULI POLATAIVAO LEUATEA: E faafetai i lau Afioga i le Fofoga Fetalai, le paia o le Falefia ma le Falesalafai lea na ou faamalulu atu. Ou te le faitioina le avatuga o le mea a le Malo, e tatau ona fai, e tatau ona fai le faaaloalo. A o Faiga Faavae ia na ou fesiligia, leaga sa ou faia le maliu o Pau Sefo Pau, o le tupe lea na o atu ma le Malo e \$5,000. Ae o lea ua faatulai mai le... ia o le a foi Sina i Futu...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Saillele Malielegaoi: Lau Afioga i le Fofoga Fetalai, o le mea lea e tutulai so o mai ai le sui usufono, o se mea e fia faasao. Ou te manatu sa le tatau ona laga i totonu i i, aua a oo loa i le faaaloalo e ave i se tasi, o faatumutumuga o le... O le Palemene, o lea e saofafai ai

faatumutumuga o itumalo, e le taitai talafeagai nei mea tatou te faia ai tatou faaaloaloga ma faaaloaloga e fai e latou o le aiga, mo le ua tuumalo. E le taitai lava, ae le mafai ona faafetauia e le Malo. E na o le pau lava o le mea, o le faatino o le faaaloalo a le Malo, e pau lava lea. O le faafetai e ave i le na tautua i lo tatou Malo, e fai foi i Faaululuga o Ekalesia, e fai foi ia i latou ia ua honor e le Malo. Lau Afioga i le Fofoga Fetalai, o le mea masani e fai e Malo, e fai foi e tatou, e tatau ona to, ave le faaaloalo a le Malo i e ua tatau i ai le faaaloalo. Sa ou manatu lava la, e le tele sou taimi e te alu ai. A o lea e te faitio mai, a o lea ou te iloa, o lea e te tau vaavaai masei, o le a toe vaemanua lava lau lauga, o lea o le a uma lau lauga. Ua toe vaemanua lava i lou matau masei, a o a upu ia na e amata ai. Na e valaau i le Atua, e aumai le loto maualalo ma le loto faamagalalo. Ua matua le aoga atoa lava le mea lea na e tatalo ai nei, ua le aoga atoa. Ua e fetuuina le faaaloalo a le Malo, a o lea sa e auai, o lea sa e auai, ma ou te iloa le mea lea e te agai i ai.

Susuga Hon LAAULI POLATAIVAO LEUATEA: Lau Afioga, o le a tuga lou faaoloataua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E le o se faaoloataua, o lea ou te tali atu...

Susuga Hon LAAULI POLATAIVAO LEUATEA: Aua e te mimiloa upu. Malie lou finagalalo.

FOFOGA FETALAI: Ia malie Laauli se i tulai mai le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te le o malamalama i le mea lea e tulai mai ai, a o le tulaga lena. Sa fai foi i lou tuua, o le a la le mea na e le taofia mai ai? Na fai foi i lou tuua, a fai la e te le malie i le mea lena, sa tatau la ona tu mai lou tootoo ma fai mai. E teena le faaaloalo a le Malo i lou tuua ua leva ona saofai i totonu o le Kapeneta, e solisolimuliaao le atalii i mea e fai e le tama. Lau Afioga i le Fofoga Fetalai, o le toe fesoasoani atu lena. O le a tauau ina le taua faaaloaloga, mea ia e le tatau ona oo i ai se leo o se isi. O le mea lena e napa ia te au ma le Kapeneta, a o lea foi ua e faitioina. O lea ua e fai mai o le faaoloataua, o ai na laga? O oe na e laga, o le faaoloataua le mea lena. Lau Afioga i le Fofoga Fetalai, ou te faamagalalo ia te oe, ou te faamagalalo. O le a le matau mai a afioaga lea na outou o nei i ai. O le a le latou matau, afioaga ia sa outou o nei i ai ma tou faaoloataua, ma ave ai le suafa mamalu o le Atua. Lau Afioga i le Fofoga Fetalai, e fua ia au gaoiga ma upu e te tautala i ai, ia lou tagata.

Lau Afioga i le Fofoga Fetalai, o le toe tulai atu lena,

FOFOGA FETALAI: Malo faafetai. O lea ua i ai le manatu o le a le nanananea le tulaga o a tatou faaaloaloga. Ou te manatu foi, o le upu lava e fai ia Faleata, ia o le a taumafa ma le foa mea a Losi, ma tulaga. Ou te musu e oo i ai se tala. O tatou e faapena, o le aso e....e faapena. O le tofa maualuga e fetuutuunai lava, o le aso e maua ai nai seleni, o le aso foi e mativa ai, e faapena. Ae aua o le mataupu e tau i lau Afioga lea e te taua, e pei o itu ia e lagona ai foi le matamuli Laauli. Ou te fautua faale-uso, taoto ia, see ese i se isi tulaga.

Susuga Hon LAAULI POLATAIVAO LEUATEA: E faafetai i lau Afioga, e pau lava lea, leaga o lea tatou te faalele fulu ae matau le atunuu. Ae o le a foi se lagona, o le a ou see ese mai le mataupu. Na ala ona ou laga ona o Faiga Faavae ma Tulafono a lo tatou Malo, ae ui i lea o le a taatia. Faamalulu atu le Falefia ma le Falesalafai, ne i e matau mai ua ou faapena, e leai e mama mea uma.

Lau Afioga i le Minisita o Faasalaluga, o lea foi na ou taua muamua foi. I le tulaga lava lea o avanoa o mea e mafai ai ona faasalalau, ia tulaga i totonu o faalauiloa, ma mea uma ia tatou te finafinau ai nei. Na matou taumafai atu ia avanoa, mea uma e tatau ai. Ae peitai, e matau ma le totoa le aafia tele o le aufaigaluega i tusitusiga aemaise foi i fesili la e ave i le Taitai o le Malo. O i lea e tupu ai le pisa, ua outou faafofoga leaga o lea e lau mai lava, o matou e faaoloataua o upu leaga ma mea... I le faafofoga a le atunuu, matou te le i lafo lava se upu e tasi e tauvaleina ai le Taitai o le Malo. O lea lava e faalupu le Taitai o le Malo, o le Afioga i le Palemia.

FOFOGA FETALAI: Ia malo, se i tulai mai lava le Minisita o Fesootaiga, Faamatalaga ma Fesootaiga Vavave Faaneionapo.

Afioga Hon Afamasaga Lepuiai Rico Tupai: O lea ua ou tulai atu lau Afioga, e le o le taimi muamua lea, e pei sa, na ona toe toa te isi a o lea ua toe agi mai le finagalo o le sui usufono i le Matagaluega lenei. E leai na o le mea e fia faasao lau Afioga, e leai, o tagata nei e fai lipoti ma le aufaigaluega e o e fai faatalanoaga o Polokalame nei. E o lava latou ma o latou mafaufauga ma latou suesuega ma sailiiliga ua maea ona fai. E le tasi se mataupu, e agai solo a latou suesuega ma latou sailiiliga ona o lea fai interview. E pei foi o le mea lea tou te silasila i ai i luga i le faasalaluga foi a lea Vaega i luga o le TV2 lea e pei e tele i ai. E sau lava a latou fesili, e le ni tamai fesili, o le matua mamafa o fesili. A o lea sa taua muamua e maua lava le avanoa. E maua le avanoa i luga o le tatou 2AP ma le TV a le Malo. E pau le mea, e i ai a tatou tupe e totogi e faaalu ai le Polokalame. O le Polokalame a le Palemia ma le 2AP, e le o totogiina, ae o le Polokalame lea e pito i sili ona tele tupe a le Malo lea e maua ai a le 2AP. E leaga o le faigofie ia ona matou o sell le Polokalame lea, sue tagata e o mai e fia faataua

e faaalu ai a latou faasalalauga faapisinisi i luga, i le taimi lea. Ona o le Polokalame ua popular tele, ua matou matauina i le tele o tausaga ua alu. E le faatoa faia lea, o le Polokalame o le faigofie ia ona sue tagata latou te faatauina, ona o le lelei o mataupu o lo o sau ai. O lea foi sa matou taumafai lava e tuufaatasi, se Polokalame e sell ai a outou mataupu. Ae o le faalavelave lena e leai ma se isi o se pisinisi po o se tagata, o taumafai e... o sau ai se fiafia e lagolago. E pei o le mea lena o lea e faigata ai ia matou. Ae a faapea e fia faaalu sa outou Polokalame, ia o lo o i ai lava tuutuuga ma aiaiga i tulaga i tau o le 2AP e faaalu ai a outou mataupu. A o le tulaga i fesili e fai i le Palemia, e le saisaitia ia i latou e fai lipoti. E alu lava le tagata ia ma ana ia fesili e fai, o le a le ituaiga fesili e tatala le avanoa e fai. E pei foi o le mea lea e faafofoga ai Samoa i la outou vaega. O le faamalamalama lea lau Afioga e tusa ma le mataupu.

FOFOGA FETALAI: Se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ou te tulai atu e faamalamalama le mataupu lea a le Minisita. O lana faasilasilaga e le totogiina se tupe i le Polokalame a le Palemia. E mafua le mea lena, ona e le o au lea e usu, ou te le o manao e o mai, a o latou lea e o mai. Sei vagana la, ua ou manao e o mai e fai sau faasalalauga, ona totogi loa lea. E faapena foi la pe a ou valaau i le TV1, a ou valaau loa i le TV1 e o mai i luga o sau Polokalame, ona ou totogiina loa lea, totogi loa lea e le Malo. A o le faalavelave lena, e leai lava ma ni Polokalame ou te manao e fai. O latou lea e usu mai e o mai e tauanau au. A o mai la latou e tauanau ia au, o le a la le mea o le a totogi ai fua e le Malo, e leai se mea o le a totogi ai fua e le Malo, o latou lea e manao. E le faapea e manao latou e fai le Polokalame, ae totogi e le Malo, e leai e le faapena ona fai ni mea. O mea na e igoa o pisinisi, o le a le mea e te manao i ai, e totogi e oe. Ae a o mai lava la latou ia te au, e leai la se tupe a le Malo. Vaai la i le matagofie o auala o lea ou te faaoga, e faasao ai tupe a le Malo. Ae amuia outou o lena e tele a outou tupe, o lona uiga o le tele o a outou tupe. O lea la tou te manao ai e fai a outou polokalame, totogi. A o au, ou te le... o le matuai ou inoino e fai nei mea, o lea e tele au galuega lelei e fai. O la e manao mai le atunuu i a latou galuega, ae saisaitia i le aualii ia e omai e fai a latou Polokalame. A o le faalavelave lena ou te tuu avanoa ia i latou. Lau Afioga o le sao lena, i te i ua faapea o lou fai fua, ae sa tataua ona totogi. E leai e le faapena, a fai e mananao latou i le mea, totogi latou. A ou manao foi ua totogi e le Malo, a o le faalavelave lena o au, e matua ou le manao e fai ni interview e totogi e le Malo. Ae a fai loa la e latou, e totogi e latou a latou paupau.

Susuga Hon LAAULI POLATAIVAO LEUATEA: Ia faafetai. Lau Afioga, e na ona matou piipiiama atu lava ma avatu nai a matou motugaafa. Se o mea e matimati ai lo tatou faamoemoe. Lau Afioga i le Minisita o Fesootaiga, ou te iloa lou tomai i tulaga faatekonolosi, e le fesiligia le tulaga lena, e lava tele. E pau lava le mea lea matou te piipiiama atu ai, o le tatou avanoa tutusa. Se o le tatou 2AP, o le tatou TV, o mea uma na o mea a tatou. Ae a oo loa la i tulaga faapolokiki, ona faatonu loa lea e le HRPP, e saunoa ae valiano isi.

FOFOGA FETALAI: Ia malie Laauli se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Sailele Malielegaoi: O la e i ai le avanoa tutusa, e le faapea e le o i ai se avanoa e le tutusa. O le avanoa tutusa, a outou manao loa i le mea, ia totogi loa e outou. O le sao lena o le mea, a ou manao foi au, e totogi foi e le... A faapea la se Polokalame faa-HRPP, e totogi e le HRPP. O le sao tonu lea, a o le faalavelave o mea ia e tutupu, o mea e manao i ai latou. A o le mea lea e manao i ai latou, o Polokalame a le Malo. Lau Afioga o le sao lena.

FOFOGA FETALAI: Ua malo faafetai,

Susuga Hon LAAULI POLATAIVAO LEUATEA: O le a le faafinaua, ua ou manatu foi e...

FOFOGA FETALAI: Ia onosai mai lava Laauli, se i fai atu le tala a le Nofoa.

Ia ua i ai le manatu, ia aua o mea faigofie, ua taua lava o mea faigofie ona o le eseese o talitonuga, e pei e faapena, o mea lava e kiliva ai le tulaga o lenei vaitau i le mea foi o lo o i ai le faamoemoe o lena itu. Ona faapea lea, e faigofie lava, ae le mafai la ona tuuina e le Malo, e tataua ona tulai atu le Malo e faamalamalama ia mea o lo o faapena ona fia fesiligia ma tuuaina ai foi le Malo. I le noanoatia o lena foi itu, ona o nisi o fuafuaga e pei ona taua. Ona i ai lea o le manatu, malie ia, ae faaiu mai lau saunoaga i le tulaga ua i ai.

Susuga Hon LAAULI POLATAIVAO LEUATEA: O le a foi foi se manatu, na pau lava lea o le auga o le taumafai atu, ona o Polokalame ia lau Afioga. O lena ua e silafia, o lou igoa lea ua faasalalau ai au i le lalolagi o Ro, Re, ma le tama lea. O ai foi lou igoa alii? Lau Afioga, o lenei lava e folo le oona o upu ia e fai. O ana Polokalame lea e tupu ai nei le faalavelave. O ai ea la lau Afioga i le Fofoga Fetalai, e faaoga avanoa e faifai ai, o le mea lena o lea e fai atu ai...

FOFOGA FETALAI: Ia se i tulai mai le Palemia e faasao.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Sailele Malielegaoi: Lau Afioga o le mea e fia faasao. E sao lelei lava le saunoaga a Olo, e tatau loa ona alu loa i lalo, ona latou talie ai lea.

Susuga Hon LAAULI POLATAIVAO LEUATEA: Ona latou talie ai lea, ua maua oe, o le faaumiga lena o le mea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Sailele Malielegaoi: Lau Afioga e leai, na ou fesiligia Tofilau i le isi aso, le Taitai o le tatou Vaega i le taimi lena a o tatou Vaega. Na fesiligia ai lea e le Taitai o le Itu Agai. O le a le mea a oe Tofilau le mea lea e fai? Ae fai mai Tofilau, that's political strategy, o le tali atu lena. Ina ne i te i ua e faapea, leaga ou te pue atua strategy to strategy. Afai la e te le matea mea na, ae o le a la le mea e te taitai ai? E tatau foi ona...afai e te taitai, ia fai ni au political strategy. Ae tau sao ai le tama lea o Faumui, o ia e taitai e matua, ona pito ai lea o Olo, a o oe, e te talavou.

FOFOGA FETALAI: Ia malo, faaii maia.

Susuga Hon LAAULI POLATAIVAO LEUATEA: E pau lava le political strategy ou te taofia ma ou faamaonia, o le honest political strategy, e pau lava lena. A o isi fekamiaiga uma ia dirty strategy o le murder strategy, o mea uma na, o mea o lea ua masani ai i. Ou te fai atu ai, leader...

FOFOGA FETALAI: Se i tulai mai le Palemia, ona toe ai lea o i laua e toa-lua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Sailele Malielegaoi: Lau Afioga i le Fofoga Fetalai, o se mea foi tatou te talie ai. Vaai o a outou talanoaga ia, e tou te manatu e fai faalilolilo ma leitio uma lava i fafo. E na ona uma lava, toe faasau uma lava e fafo iinei, o le tele o a outou mataupu ia e fai i fafo, matuia, lea la e faavae ai fesili ia e tuí mai ai au pe sao. E tatau loa la ona ou faasaoina, o lea la e pei tou te tetei ai, o lo outou manatu, o la e na o fafo la ua maua a outou faasalalauga, ae o lea ou te iloa uma. E ala ona ou iloa, o lea foi e atamamai le au media latou. E pue uma lava a outou faasalalauga ia i fafo, o i ina lea e fausia ai a latou fesili ia e o mai ia te au, ma le mea lava lena lau Afioga. A na faapea e leai ni a latou Polokalame faapea e faaleaga ai le Malo, e leai foi ni fesili e faatupu manatu i le media. E leai foi ni matou talanoaga i mataupu na. O lona uiga la, e pei lava o le mea foi lele, o le boomerang foi lele a

Ausetalia e togi, e vilivili lava toe sau. Ona faapea ai lea o le isi toeaina sa announcer i le 2AP i aso la, faaeteete i mea ia, aua e alu lava toe come back.

Susuga Hon LAAULI POLATAIVAO LEUATEA: Ua uma se lagona.

FOFOGA FETALAI: Ua maea le taimi o le sui usufono.

Susuga Hon LAAULI POLATAIVAO LEUATEA: Ia faafetai i lau Afioga i le Palemia, o agaga na, e pau lava lea, o faafofoga le atunuu. E leai se taimi, o ou gagavale ai i lou suafa i luga o upega o faamatalaga. Not even one day or one second. Ou te gagana vale ai i le faafofoga a le atunuu, e leai se taimi leaga e ava i lau Afioga i le Palemia. E folo le oona, o lea lava e amo puapuaga ma aafu le ie talatala ma le lefulefu. Ona e a? E tausi le va lea, e puipui le va lea leaga o oe o le Taitai filifilia, sa ou tusilima foi i ai. A o agaga na, malie ia oe le toeaina, tatou talie ai lea, faia le upu lena e faauma ai nei mea. A o le tuualalo lava ia, Tuilaepa, tatou sauni fiafia i le palota. Ia tatou savavali fiafia e pei ona fetalai le Susuga a Lufilufi ananafi, pule Samoa i lana faaiuga e fai. O le a foi so matou naunau atu ma mea uma na matou taumafai atu, lau Afioga i le Palemia, silasila le lagi i le lagona ma le manatu, e tumu i le ava ma le faaaloalo.

O le tulaga lea i lou taitai, I was born as a leader, yes. Ma o lou olaga, ou te le tautua fiamatai, o lena tou te silafia lau mea sa fai. O outou uma lava nei na mafua ai ona one party state le mea. O le a le mea na ala ai ona mafua ona le toe i ai se isi vaega, ua fiu Olo e taumafai le Tautua, e le i toe sao. Ona o le a? O le galuega lena sa fai. That's why, aua la ne i galo, o lea foi ua ou faamalulu atu, malilie outou o ou uso. O ai ua agai atu tou te o, tatalo i le Atua...

Tofa Olo Fiti Afoa Vaai: Lau Afioga i le Fofoga Fetalai, na o si mea lava e fia faasao a o le taimi o ou i le Tautua.

FOFOGA FETALAI: Ona tulai mai ai lea o le isi ona uso.

Tofa Olo Fiti Afoa Vaai: E sao o le taimi lena o ou i ai i le Tautua, ae o lea ua ese le mea lea ua ou i ai. E sao le Afioga i le Taitai o lenei Vaega. A o le taimi foi lena, o dirty strategies uma ia na fai e ia lea, na matou faaletonu ai foi matou. E pei o nai mea na e faasao ai, a o le mea la lea, e na o mea mama ma mea kiligi uma mea lea ua fai e Laauli. O le mea lea e matuai to lou pulou ia Laauli, a o lea e fai e le aualii lea e toe mai. Ma le faaaloalo.

Susuga Hon LAAULI POLATAIVAO LEUATEA: Ia Olo, I'm sorry, e sao oe. E na o oe lava na survive mai le toatele lea na taumafai le Tautua,

sosola isi aualii i o, sue le mea e ola ai, a o oe na survive lava na o oe. O le filifiliga o le Taitai o lenei aiga o le Faatuatua i le Atua Samoa ua Tasi, o le tali lena mai le Atua. Ona na ou tulai i le aso muamua o le a faatu le Vaega Faaupufai, le Atua, saunia e oe le auvaa o le faamoemoe lenei. Fai mai upu, se ai na o le toa-lua toa-tolu, ai na o latou ma Olo ma Faumui. Ua a nei? Lau Afioga le auvaa lea, o la e faafogafoga mai tupu ma tamalii o le atunuu. O outou o lupe o le a felelei aua le taumafaiga o le atunuu. A o le agaga lena, o le taitai, lau Afioga i le Palemia, tatalo i le Atua, po o ai o le a lua feagai pe a taliu mai le faiga palota, ia tatalo i le Alii. A o le matou tatalo lena ma le faamalamalama, e le faapea foi e fealofaia ni upu, a ua ave le faaaloalo i le ua tatau i ai le faaaloalo. O upu a le itumalo lenei, e fesili le mulimuli mai ia mua mai, o le faavae lena. A o le tatalo i le Atua lau Afioga i le Fofoga Fetalai, ina ia maua le autasiga. O le mea e finagalo i ai le aiga o le Faatuatua i le Atua Samoa ua Tasi, o le tulaga lena. But my time is my time. At the moment i le taimi lenei, o au lea e sao i le aiga, se i maea le tatou Fono, ona toe filitagaga lea o le tofa ma le faautautaga, po o ai le sao. O le sao e feagai ma le Afioga i le Palemia.

O le matou tala lena, e ui o lea, Samoa lau tapuaiga i lenei aso, o le a seu i fanua le sa o le tautai o le fua ua la, foi foi le tautai i ona aiga tautai, aua o lo o tapuai mai itumalo mamalu o Samoa, alaafaga ma nuu ma afioaga. E mavae le uto ma le upega a o le Atua, o le tatou Maluapapa ma le Maaola o le fale faale-Agaga. O Ia o le ipu mua o le tapuaiga ma le falemua na te filifili, na te faamanuia mo i tatou aua lo tatou valaauina.

Lou tuafafine ia Faaulusau, tualuga lau upu ia te oe. Faafetai tele mo le ta nofoaiga, amuia lo ta taimi, e 2 sui o le ta itumalo. E avatu foi lau faamanuiga ia te oe, aua ne i avea upufai o Malo e tupu ai ni vevesi, e tino toto ma aano soo, e tau a u tau i le pau. A o moomooga alofa na, ou te faamanuia atu foi i lau Afioga ma lou alofaiva. E faafetai foi mo lou tauavameaina ma mea uma i le taumafaiga o lo ta itumalo. Ae malo lava lau finau, o la ua fai le auala laupapa i Aopo ma mea uma, viia le Alii. O le ta galuega fai faatasi lena.

Ia foi mai lea o se tala Samoa, lau faafogafoga i lenei aso, afai ua tau laulu pe ua toli puou le gaoa sau tala faa-tama a le po, ia malu ave i fale lo outou finagalo. Lau Afioga i le Fofoga Fetalai, o moomooga alofa, ia tumau le la i luga o Kipeona ma le masina i luga o Ainona, aua lou soifua manuia. Amuia au nei na ou maua mai se Fofoga Fetalai, e aoao mai i tulaga o le faatamalii aemaise foi le faafaleupolu.

Lau Afioga i le Palemia ma lau Kapeneta, le mamalu o le Maota Fono a Samoa ma le tapuaiga a lou itumalo i Samoa nei ma atunuu mamao. Ia tatou tatalo i le Atua, ina ia foai le filemu i le tatou faiga filifiliga. Aua ne i i ai se peau e laga po o se mea e faaletonu, ia toafimalie le atunuu. O le tatalo lea a le Faatuatua i le Atua Samoa ua Tasi. Ma le faamoemoe tatou te maua se

faiga filifiliga manuia ma le saoloto. Ia filifili ma le Atua Samoa. Soifua ma ia manuia.

Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Gagaifomauga Nu 3.

FOFOGA FETALAI: Ia saunoa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te tulai atu e momoli atu le faamalo, i le saunoaga a le Afioga i le sui usufono mo Gagaifomauga Nu 3. Sa i ai lava le agaga ou te le faauilavea, sa ou manatu se i maea lelei le saunoaga ona faatoa ou tulai atu lea i se mataupu e tataua lava ona ou oo i ai. Ae peitai ane, ua faauilavea le Minisita i se mataupu taua tele, ae totoe ai lava le mataupu lenei sa laga i le amataga. E le mama ia te au, ona e le o se tulaga e tataua ai ona tuuloa ona e pei e foliga mai e atagia ai le Palemene lenei o Samoa. O le lafoga a le sui usufono i le amataga, “a na le seanoa le Palemene e te le lailoa.” Pe a na le seanoa le Palemene e te le lailoa, o lona uiga ua lailoa le atunuu lenei o Samoa talu ai le Palemene o Samoa. O se itutino na matua moemiti i ai o tatou tuua. Aisea? Leaga o totonu o le Palemene lenei, o lo o tau i ai pulega mamalu a Samoa atoa. Aua Aiga ma a latou Tama, faapea foi Tumua ma Pule, Ituau ma Alataua Aiga i le Tai ma le Vaa o Fonoti. O lea ua avea ai sui o le Maota lenei o tootoo o itumalo tupu ma ee o Samoa atoa, lea ua i totonu o le Palemene lenei. E latou te soalaupuleina Tulafono ina ia mafai ai ona siitia le atinae o Samoa, i ona vaega uma.

O aoga a fanau, o au o matua, togafitiga o tatou o e mamai, ia faapea foi ma le lufilufiina o seleni ina ia talafeagai ma le atinae o lea itumalo ma lea itumalo. E le gata i lea o le puipuiga, o le saogalemu o tatou nuu mai ia i latou e solitulafono.

O le auau atoa lena ma le maualuga, o le agaga na faatu ai le Palemene lenei o Samoa, ma le agaga na mafua ai, ona tofi mai ia sui usufono o itumalo o Tupu ma Ee o itumalo e sausaunoa ma fai sao i mataupu ogaoga e manuia ai ia lo tatou atunuu.

Afai la o lea ua to le matupalapala o itumalo o sui usufono o le Palemene lenei e latou te avea mamalu faalupe o itumalo i tupu ma ee, ma latou aumaia i totonu ma faaleo i totonu o le Palemene lenei le finagalo e manuia ai le itumalo, ae o le a lea lafoga? A na le seanoa le Palemene, Samoa e te lailoa. Lailoa i le a? Mafatia i le a? O lona uiga ua lailoa i iuga e fai i le Palemene lenei o Samoa?

Lau Afioga i le Fofoga Fetalai, e le mama ia te au upu ia. Ua vaai maualalo ai i le mamalu o tupu ma ee lea e saofafai i totonu o le Palemene lenei. O le matua le mafaufau o upu ia, soona lafo i sui usufono o le Palemene lenei. O

latou na tofia mai e tupu ma ee o le itumalo ua to i ai le latou faamanuiaga, faapaia e latou faafeagaiga taulagi, e omai e latou te faia tonu o le Malo Tutoatasi o Samoa.

Ae o a ia lafoga? Pe a na le seanoa le Palemene, e te le lailoa. O lona uiga, a na le seanoa lenei Palemene, semeamanu e le malaia le atunuu. O lona uiga ua matua malaia le atunuu, talu ai sui usufono nei e saofafai i totonu o le Palemene ma Tulafono ua latou faia e atiae ai le atunuu ma puipui ai le atunuu.

Lau Afioga i le Fofoga Fetalai, e maoae tele lafoga ia. Ua matua vaai maulalo, vaai maulalo lau Afioga i le tiute fai, o lea sui usufono ma lea sui usufono i totonu o le Maota lenei. Ua matua vaai maulalo i le tofa na tofia ai le tofa i lea itumalo ma lea itumalo, aua o saunoaga uma lava a le sui usufono i totonu o le Maota lenei, o le fofoga lena o le itumalo. O lona uiga o mea ia e faia e tatou ma saunoaga e aumai, e na o mea leaga, mea leaga o lo o lailai ai ia itumalo.

Lau Afioga i le Fofoga Fetalai e tataua ona aveese upu ia, soloia ese ma faamaumauga a le Palemene, leaga e faalumaluma i itumalo uma o Samoa, faalumaluma i le Nofoaiga lenei ua tele mea lelei ia e fai.

Lau Afioga i le Fofoga Fetalai, o le mea lena na ou manatu ai, o le a taatia lafoga ia seia ou oo i ai...

Susuga Hon Laauli Polataivao Leuatea: Lau Afioga i le Fofoga Fetalai..

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: I le faaiuga, e aveese mea ia ma faamaumauga a le Palemene, e le talafeagai ma le mamalu, ma le mamalu o le Palemene lenei ma le mamalu o itumalo na filifilia i latou nei.

Lau Afioga e le talafeagai, ma le filifiliga a le Atua na tofia ai latou uma nei aua o tofiga nei, o tofiga mai i le Atua i le tatou talitonuga lea faakerisiano. O le mea lena ua ou tulai atu ai e avatu se manatu e soloia ese upu ia ma tatou faamaumauga leaga e le mafaufau.

FOFOGA FETALAI: Ia tulai mai...

Susuga Hon Laauli Polataivao Leuatea: Lau Afioga ae le i faia lau faaiuga, Toleafoa malie lava...

FOFOGA FETALAI: Le sui usufono o Gagaifomauga Nu.3...

Susuga Hon Laauli Polataivao Leuatea: E na o sina minute lava se i avatu so ta lagona aua ou te iloa lava e aveese. O le mea lava e saunoa i ai le Palemia o le mea lena e fai. Malie lau Afioga se i avatu sou avanoa leaga e ese le upu lea na ou taua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai o se mea e fia faasao. A uma lea sese, aumai lea sese.

Susuga Hon Laauli Polataivao Leuatea: E ese le uiga o le mea lea ou te faia atua. O au e ona le upu, o au e faauigaina le upu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga o se mea e fia faasao...

FOFOGA FETALAI: Malie le saunoaga a le sui usufono se i tulai mai le Palemia se i...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le upu lea faapea e saunoa loa le Palemia ona soloia loa lea. Sa e Fofoga Fetalai, e le faia toatasi e se tasi se iuga. O le mataupu lena, e aumai i totonu o le Maota lenei. Sa e Fofoga Fetalai, ua tele lou faaoloataua.

Lau Afioga i le Fofoga Fetalai, faasao le mea lea, ou te le faia toatasi se tonu i totonu o le Maota lenei.

FOFOGA FETALAI: Malo faafetai, ia se i tuu atu lava...

Susuga Hon Laauli Polataivao Leuatea: Ia lau Afioga malie Tuilaepa faamalulu atu, faamalulu atu i lau Afioga...

FOFOGA FETALAI: Se i saunoa mai lava Laauli o le a lau faauigaina o le... ona e talu ai ona o lea e mafua ona ou manatu, o lo o faamauina foi le upu lea. Ia o tatou Tulafono Tumau, o se upu po o se saunoaga faauigalua ia e teena ma e le talia e faamaumauga a le Palemene. Ia sa e seei foi i le Nofoa ia o le tiute lava lea o le taumafai ina ia faapena ona solo lelei se saunoaga a se sui usufono mamalu ia aua o a tatou saunoaga mai i lea taimi i lea taimi i le tatou Paeaiga lenei, e faapena ona faasolo mai le atunuu ma o latou faitau i ai. Ia e pei o le lagona lea ia e eseese lava talitonuga ma lou finagalo...

Susuga Hon Laauli Polataivao Leuatea: Ioe malie lava ae e le i faia lau faaiuga Toleafoa ua ou tatalo atu...

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, tuu tasi mai se avanoa se i fai atu sa ta tala...

Susuga Hon Laauli Polataivao Leuatea: E tasi lava le agaga lea na ou manao e faamalamalama, ona o la'u upu, 'Ana le seanoa le Palemene, e le lailoa Samoa i lona afu ma lona tamaoaiga o lea e aumai e tatou te faasoa'. O le uiga lena o lau tala na fai. O ai le tamaoaiga lea e faasoa e le Palemene i le Tala o le Tupe lenei? O le afu o le atunuu, o le uiga lena o lau upu Toleafoa.

FOFOGA FETALAI: Ia faafetai

Susuga Hon Laauli Polataivao Leuatea: Lailoa Samoa i le tautua o galuega la e fai e aumai lufilufi e le Palemene.

FOFOGA FETALAI: Ia, malo faafetai. Ia o lea la o le a ou...

Susuga Hon Laauli Polataivao Leuatea: O le agaga lena o lau upu. Ia o lea o le a mimilo lata upu e oo i se isi tulaga...

FOFOGA FETALAI: Ia o lea o le a ou fesoasoani atu...

Susuga Hon Laauli Polataivao Leuatea: Faamalulu atu.

FOFOGA FETALAI: Ia faafetai.

Susuga Hon Laauli Polataivao Leuatea: Leaupepe e mama o au e ona le upu, o au foi e faauiga le upu.

FOFOGA FETALAI: Ia malo faafetai.

Susuga Hon Laauli Polataivao Leuatea: Ia o mea lava ia a le toeaina e tu ifo mimilo i Sasae mimilo i Sisifo ia ona uma ane lea ua sese lata upu na fai. Ia ae o le agaga lena.... o le lailoa o Samoa, o lana tautua mo le Malo. O le uiga lena

FOFOGA FETALAI: O lea la o le a ou fesoasoani atu, ia aua o lea... ia, e matau atu lava i le sui usufono...

Afioga Tafua Maluelue Tafua: Faafetai, lau Afioga i le Fofoga Fetalai i lou ava ma lou faaaloalo e le i faalavelaveina foi le saunoaga a le sui usufono mamalu, ae o lea na ou faamauiina le upu, 'A na le seanoa le Palemene lenei, e le lailoa'. Ia o lea ua faauma mai e le Afioga ia Laauli le faasaoga, ae ua ou tulai atu ma le faaaloalo lau Afioga i le Fofoga Fetalai e faatu le lafo, *Ina ia aveeseina upu ia e pei ona ou lauina atu.*

Oi e faalua leaga o lea na faatu mai e le Palemia ma le faaaloalo.

FOFOGA FETALAI: Malo faafetai, ia e faapena. O tatou e mau e faalele, mau foi e matau, aua o le uiga tonu lena i le matou matau.

Susuga Hon Laauli Polataivao Leuatea: Lau Afioga i le Fofoga Fetalai e faamalulu atu...

FOFOGA FETALAI: Ia faafetai.

Susuga Hon Laauli Polataivao Leuatea: E momoli atu foi vaimalu i puega i le faafofoga a le Palemene ma sau upu na lafo, ia ae faamasino le Atua ma le atunuu, i le fatu na ala ai ona ou faia le upu. O le tautua a Samoa, ma le afu maligi o Samoa, o lea e tatou te faasoaina. O le lailoa lena sa ou tauina, ia ma lou agaga faaaloalo, ia manuia lo tatou aso.

FOFOGA FETALAI: Ia malo faafetai, a na faapea, a na le seanoa oe Samoa e le lailoa le Palemene. O le sao lena, o le upu lea i lou finagalo.

Susuga Hon Laauli Polataivao Leuatea: Ia pule ia lau Afioga o lena e i ina le tofa...

FOFOGA FETALAI: Ia faafetai...

Susuga Hon Laauli Polataivao Leuatea: A o lau upu na lafo, o au e faauigaina le upu ma lou agaga faaaloalo...

FOFOGA FETALAI: Ia, o lena e sao lou finagalo...

Susuga Hon Laauli Polataivao Leuatea: Ona tatou talie ai lea, ae o le a ou alu e i ai nai mataupu la e faatali mai ma lou agaga faaaloalo.

FOFOGA FETALAI: Ia, feiloai pea...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Ia se i tulai mai le Palemia...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai ia le tatou muagagana, *'E mau e faalele, faalele fulu, e i ai e matau upu'*. *'E mau e faalele, faalele fulu, e i ai e matau upu'*. Ua matua manino lava upu ia, aisea? Leaga o le upu o le upu o le pese.

O lona uiga o lea ua e faaaogaina upu o le pese lena, e agai mai ai i le Palemene. O lona uiga o le Palemene lenei, ua mafua ai ona lailoa le atunuu ia po o le lailai le atunuu atoa talu ai le Palemene lenei. E manino lava le lafoga. Vaai o lea e pue uma mai e sui usufono. E leaga o le faitioga, e agai uma lava ia i matou.

Ioe, o le ala lena, e le aumaia lou manatu, e na o oe e faauigaina, oi, ae a faapefea le muagagana lea ua gagana ai Samoa? E a oe e faalelefulu, ae o lea e matau upu le faafogafoga a le atunuu. A o atu nei la matou ae faapea mai itumalo, oi e te nofo lava? E te nofo lava ae e le faasao mea sese ia e aumai? E i ai le tiute o sui usufono uma o le Palemene lenei, e tatau ona faasao ni mea ua faaletonu.

O le ala foi lena na amata ai e le Vaega lenei i le tausaga e 1983, le faiga lea. E na o le pau lava le taimi e faasao ai le uamea pio, o le taimi o la e vevela ai, pau lava lena, aua e te toe faatali i se isi taimi.

Lau Afioga i le Fofoga Fetalai, o lou toe tulai atu lena.

FOFOGA FETALAI: Ia, malo faafetai ma ua muta ai foi i i lea mataupu, aua e...

Susuga Hon Laauli Polataivao Leuatea: Lau Afioga...

FOFOGA FETALAI: Laauli...

Susuga Hon Laauli Polataivao Leuatea: Ia Tuilaepa, malo oe.

FOFOGA FETALAI: Faafetai...

Susuga Hon Laauli Polataivao Leuatea: Lava lea, tuu a ta upu ma ta tala, faamasino le atunuu, faamasino le Atua.

Faafetai i lau Afioga i le Fofoga Fetalai mo lou avanoa. Manuia taualumaga o le Fono.

FOFOGA FETALAI: Faafetai. Ia, ma e... ona e matau atu o lea o le a e tulai, ia o le a le afaina pe afai o lou finagalo lea. Ia, e manatua foi e tasi lava le tagata e faauigaina a tatou saunoaga, ma o le Fofoga Fetalai. Ioe, e faauigaina.

Sa ou nofo ma au ma ou faamauina, ia o le ala lea ua ou manatu ai, e le faapea ua ou afisi le finagalo o le Palemia ae ou faasavali ia lou finagalo. Ia ae o le uiga lena. O le mea la lea ou te faamalulu atu ai Laauli, afai o lou finagalo lea, atonu o lea e sao lou mafaufau, sala o le upu e foi mai i le Nofoa, e sao le mafaufau ae sese le upu la e lafo.

Ia o le mea la lea, o lea ua faatu mai ua saunoa le Palemia ae o lea foi ua faatu mai e le isi foi alii matua o le tatou Palemene e faaluaina le finagalo o

le Palemia ina ia aveese le upu lea ia, ma e o le a tuu atu le fesili e faamaonia e aveese upu ia mai faamaumauga o le tatou Palemene.

Na faamaonia le lafo.

[Upu na faatonu e le Fofoga Fetalai e aveese mai faamaumauga o le saunoaga a le sui usufono mo Gagaifomauga Nu.3 – 0“*A na le seanoa oe, a na le seanoa le Palemene lenei, e te le lailoa Samoa.*”]

FOFOGA FETALAI: Ia o le tulaga lena, e aoga mo le lumanai, aua foi le naunauta, aua foi le naunautele, ia ae masae ai le upega pe a... e ui lava ina maua ia, ia ae masae ai le upega. Ui i lea, e i ai le manatu, malo le saunoa. Ua faafofoga Samoa i le saunoaga a Laauli, ia e faapena, tatou faamoemoe i le Atua.

O a fuafuaga fai, ia e tofu tatou ma lagona, e na o le Atua e i ai le amiotonu e faapena ona limataitaiina ai le lumanai e tusa ona i ai le alofaiva o le Malo ma le atunuu, i na masina o lo o muamua.

O le mea la lea, ua avanoa foi le Nofoa mo se isi foi sui usufono e fia saunoa, ia ma sa logoina mai au e le sui usufono o Faasaleleaga Nu.3 le Afioga i le Taulagi ia Tofa Foleni, sui usufono mai Faasaleleaga Nu.3, tulai maia e te saunoa, manaia lou avanoa lenei.

Afioga TOFA FOLENI LIO TAMA GALU (Faasaleleaga Nu.3): Ia faafetai mo le avanoa, lau Afioga i le Fofoga Fetalai. E muamua ona sii le Viiga ma le Faafetai i le Atua aua lenei taeao ma lenei foi aso i le Fonousu a Samoa. Tatou i ai foi i le aso lona 2 o le masina lona 2 o lenei tausaga, ia e maeu lava le alofa o le Atua ia Samoa. O le mea lea le Atua, faafetai, faafetai i lou alofa ma lau taitaiga aua le sa o Samoa i lenei tausaga. E ui lava ina tele faafitauli, faamai ma faalavelave i le lalolagi, a o lea lava e to’a lava Samoa. O le mea lea le Atua, foi lava le viiga ia te Oe. Lou agaga e, faamanu i le Atua, aua ne i tatou faagalo meaalofa a le Atua. A oo i le taeao vivii i le Atua, faafoi le viiga i Lona alofa. A oo foi i le afiafi, tatalo i le Atua e tautau Lona faamaoni. Faafetai.

Faafetai i lau Afioga i le Fofoga Fetalai, o lea foi sa e molia mea i Matautusa e talosia ai le Fonousu a le Palemene. Ia, tau ina ia logo malie i le faafofogaaga a le Atua le tatou taulaga molia.

A o lenei itula, ou te ofo alofa atu i lau Afioga i le Fofoga Fetalai aua lava le taitaiga o le Fonousu a Samoa. Ae muamua ona ou faatulou, tulou i le Maota i Tiafau, tulouna le Maota i Tiafau o le malae o le Faautugatagi a Samoa. Tulouna a Tiafau o le malae e saili ai le tofa ma le faautautaga, pule mamalu a sui usufono o le Malo aemaise Samoa o tapuai mai, tulouna le

Maota i Tiafau. O le Maota e tulutuluitao ua soo lona taiao, e leai se isi e faatamala i ai pe tautala faa-tama leaga o le Maota o Samoa e leo e Tumua ma Pule, Aiga i le Tai ma le Vaa o Fonoti. Ia, tulouna Tiafau.

E muamua ona ou faapai ma ofo alofa atu i lau Afioga i le Fofoga Fetalai o le Maota, lau Afioga Toleafoa Leaupepe Faafisi, malo le galue, faafetai i lau taitaiga o le Fonousu a Samoa i lenei Paeaiga. O lea lava e matauina o lo o maua pea lou soifua maloloina, maua lou malosi i le tino, mafaufau ma le agaga. Aisea? Leaga o oe ua valaauina e le Atua aua lau taitaiga o le Fonousu a Samoa.

E le galo foi lou Ofisa o le Fono, o lena e susu mai le Failautusi ma lona Lagolago, faapea foi alii ma tamaitai o le Ofisa o le Fono. Faafetai i galuega lelei, faafetai le tautua. I lau matau i lenei Paeaiga, tou te galulue ma le faalogologotiga i le ao ma le po, timuia, sautia, laina. Aisea? E tautua le Palemene o Samoa ma lana Fonousu. O le mea lea, faamalo i lou Ofisa, e le gata i le tautua, a o le tulaga foi o le tapenaga o taumafa ma mea faapena, malo faafetai.

Ae manatua i lou loto le amataga o lenei Paeaiga, sa tatou amata i le Maota i Tuanaimato, tele galuega. Ae faafetai i le Atua o lea ua tatou faaii i le Maota nei, ia, o uiga na, o uiga lea o le Atua e faaoga avanoa, ae faamalo i le Ofisa o le Fono ma le mamalu aua la outou galuega.

Ia, liliu mai lea i lea Itu, e momoli le faafetai i lau Afioga i le Palemia, le Taitai o le Malo i lau Susuga Tuilaepa Malielegaoi. Malo le onosai, malo lou lototele. E tele fita, tele faigata aua le galuega, ae malo le lototele. Faafetai i galuega lelei, malo foi matau i le Atua. Ia, leaga o lau Afioga ua valaauina e le Atua e taitai le Malo o Samoa. A lea ua iloa lava i lenei Paeaiga ma Paeaiga foi ua mavae, o lea lava e maua lou soifua lelei. Faafetai i le Atua. Faafetai i le mamalu o le Kapeneta i alii ma tamaitai Minisita, faafetai i galuega e tele, aemaise lo outou lagolago i le tatou Taitai le Palemia. Ua sologa lelei lava galuega o le galulue faatasi. Malo galue, faafetai foi onosai. E tele faafitauli, o feau, ae matauina o lo o i ai pea le agaga o le Atua i lenei Palemene.

E momoli foi le faafetai i lena Itu o le Maota, o lena e afifio mai Afioga i Taitaifono o Komiti Faa-Palemene ma sui usufono, faafetai i la outou galuega, leaga o la outou galuega e toe lufilufi Tulafono ma tulaga faapena. Faafetai i galuega, aemaise lava le tele o semina ma galuega, Malo faafetai.

I lea foi Itu o le Maota i Afioga i Minisita, ia leaga o tatou lava na tofia e Minisita o lo o afifio mai. Faafetai foi i le valaaulia o tatou e lagolago i le galuega a le Kapeneta ma Minisita. Faafetai i le Atua ua faaogaina le vaivai o le tagata aua ia feau. O le mea lea, o le maualuga lena.

Ne i galo foi le leo o le Afioga i le Satini o le Maota faapea le malu o le Malo o lo o latou tausia le filemu ma le saogalemu o le Palemene, malo galue, malo foi le finau, aemaise le onosai ma le lototele aua lava taimi e usuia ai le Fono i Tiafau nei.

Ae momoli le faafetai i Ofisa Sili o Pulega, Pule Sili ma Pule Sili Lagolago, aemaise Matagaluega a le Malo faapea foi Faalapotopotoga, Pisinisi Tumaoti, faafetai i la outou lagolago, leaga o outou ma lo outou mamalu e faamoemoe i ai le Malo. E tele taimi, e tele foi aso i galuega e tele o feagai ma outou, ae faamalo le galulue. O lea lava o le a faaii lenei Paeaiga, e leai lava se mea o faaletonu. Ia, e i ai foi nisi taimi e sasi ai a outou feau, ae faamalo galulue, o le uiga lena o feau, e le asa lava se faiva ma se maumau. E lamatia foi le soifua ma le tatou ola e le tiapolo, faalavelave, ae faamalo le onosai, faamalo le mataala.

Ae i lenei foi taimi e momoli atu le faafetai i le tapuaiga a le Malo, i Lana Afioga Mamalu O Le Ao o le Malo ma le Faletua, lau Afioga i le Tuiaana, faafetai mo galuega. Tainane foi le Fono a Sui Tofia lau Afioga Le Mamea ma le faletua. Malo. Ou te iloa o le uiga lea o galuega, o lo outou lagolago i le tatou Malo, aemaise nisi o fuafuaga fai. Ae faafetai i Lana Afioga Mamalu, O Le Ao o le Malo faapea foi le Fono a Sui Tofia, aua le lagolagosua i tonufai o le Malo e manuia ai Samoa.

Ia, ona ou liliu atu lea i le tapuaiga a Taitai o Ekalesia e fia, Fono a Ekalesia, Taitai o Ekalesia, faafetai le nofo tatalo. Tasi lea galuega lelei o lo o manuia ai le Malo ma le Palemene o la outou tatalo i le ao ma le po. Afai lava o Samoa o le atunuu e faavae i le Atua le Tama, le Atua le Alo ma le Atua le Agaga Paia, e leai lava se isi mea, tatou te matau lava i tatalo ma anapogi e manuia ai Samoa. O le mea lea, faafetai i le aufaigaluega paia a le Atua, o outou aiga ma Ekalesia e fia i Samoa, faafetai mo la outou tapuaiga.

Samoa, malo mo la outou tapuaiga. Le paia aua Tama ma Aiga, o Aiga ma Tama, Tumua ma Pule, Ituaa ma Alataua, Aiga i le Tai ma le Vaa o Fonoti, malo le tapuai Samoa. E leai, e talitonu lava e manuia faiva ma tiute o le Palemene ma le Malo ona o la outou tapuaiga mai afioaga ma alaalfaga. Malo faafetai.

E le galo foi le tapuaiga a Tutuila ma Manua aua le faigamalo a le Afioga i le Kovana ma le Kovana Lutena, tainane foi le paia aua Sua ma le Vaifanua, Fofu ma Aitulagi, Saole ma Saleaamua ma le Launiu Saelua, Tootoo o le Faleula, Tama a le Manuatele. O paia na o Samoa o lo o manuia ai le faigamalo ma la outou tapuaiga. Ia, afai e galo se isi mea i le lauga, ia, e galo lava o le vaivai. Ou te talitonu o lo o faapena ona manuia le tapuaiga a Samoa aua lenei Nofoaiga ma le Palemene.

Ia, ona ou amata mai lea i si ou itumalo, o la e tapuai mai le paia aua le Taulagi, Toleafoa ma Vaafusuaga, tainane foi le Susuga i le Maopu ma Usoalii, i le Matua Fetalai ia Segi, faapea le Pulealeuu, le Faleaana ma lo outou Toafa, faapea foi le Falefitu, lau Fetalai Tatau ma le mamalu ia Salemuliaga. Faafetai i lou itumalo, faafetai mo galuega faatino i le tatou itumalo mai lava i Siufaga i le malae i Siufaga seia paia le malae i Taotooto. Malo tapuai, malo foi le tatalo. E le gata i lo outou sui usufono, a o le manuia o Samoa ma le Palemene. O le mea lea faafetai i le tatou itumalo o

Faasaleleaga Nu.3, faafetai mo galuega. Faafetai mo mea uma, aua lava la outou tapuaiga.

Ia, i lenei itula, e faapea le lauga, o le lauga a lenei itumalo, na o le lagona o le faafetai. Na pau lava lea o le mea e fia tautala i ai le sui usufono mo Faasaleleaga Nu.3, o le momoli atu o le agaga faamalo ma le faafetai. E i ai le muagagana lea ua faa-fagogo tagiao i le Palemene ma le Maota faapea foi nisi o Nofoaiga ua mavae, o le mea e lelei i Upolu, e lelei foi mo Savaii. O le mea e lelei i Savaii, e lelei foi i Upolu. E ese le taua o lenei muagagana po o lenei fuaitau. Ma o i lea e fia avatu ai le agaga faamalo, faafetai i le tatou Malo aemaise lau Afioga i le Palemia ma le Kapeneta faapea foi Ofisa Sili o Pulega o Matagaluega. Faamalo faafetai mo galuega lelei i Upolu, tele atinae e matauina e matou mai Savaii, tele le suiga ua i ai le tatou motu nei i Upolu, aemaise o iinei i Apia, e fai o auala, o vai ma itu uma faapena. Faafetai, faafetai i nei galuega tetele. O lea lava e faagasolo le faapaia ma tatala o nisi o auala, ia o le agaga lena o le Malo, o galuega e iloa ai. Fai mai le Aposetolo, “E tupu le faatuatua o galuega.” A leai ni galuega, e mate lava le faatuatua. O le mea lea e faafetai i lenei itumalo i galuega fai a le tatou Malo, e tele galuega i Upolu, ae se i ou tautala i galuega lelei mo matou nei i Savaii.

Ia, faafetai. Ou te iloa a outou oo atu i Savaii ua tele foi se suiga o Savaii, ua tutusa lava Savaii ma Upolu, leaga o le mea e lelei i Upolu ma Apia o lale ua manuia ai Savaii. O le mea muamua, o auala i Savaii, le auala taamilo lea e alu atu i Salelologa, alu atu i Palauli ma alu atu ai i Salega, alu ane i Asau ma le Itu o Tane toe pai mai i le Faasaleleaga, oka se matagofie o nei galuega. O aso lava ia, leaga auala, a o lea ua faagasolo mai faigamalo, aemaise lenei Paeaiga, ou te molimau atu, o ni auala lelei ma le mautu, lautetele ma malosi. O le mea lea, faafetai i galuega. Leaga o galuega nei o auala, e faamuamua lava i finagalo o tatou tagata. Aisea? Maua taavale, toeitiiti lava 3 i le 4 taavale a isi aiga. E faigofie auala e feoi ai, aemaise le mea lea na tatala ai le itu auala i le 2009 i le agavale, o lea lava ua tatou molimau e le gata i Savaii a o Upolu, ua faateteleina taavale. Ma o le fua la e faatetele ai, ua lelei auala, e o i uta, o i tai, taamilo, faafetai mo nei galuega.

E faaopoopo le faafetai i mea tau auala, auala lea e alu atu i Fusi Safotulafai alu atu i uta i Patamea, aemaise le toese lea i Vaiaata, faafetai mo lenei galuega tele. E pei ona saunoa nisi o sui usufono, o le agaga lea, o le agaga o le faamalo ma le faafetai i nei galuega tetele. Ma o le auala foi lea, e alu atu lava tau i le auala laupapa lea sa tatala i le tausaga ua mavae o le Maliolio, e ese le manaia, malosi ma lelei. E ui lava la toeitiiti maea le auala lenei, a o la e lava e faagasolo lava galuega.

O le isi mea e talanoa i ai i lenei auala, o lo o i ai le kolisi lea a le Ekalesia Mamona lea e i i Tapueleele. Tasi lenei kolisi e tele alo ma fanau a Savaii o lo o aoga ai o le kolisi lea i Vaiola. Ia, o le taua tele lena o le auala. Ma le isi foi vaega lea a le Malo i le toese i Vaiaata, ia, tasi lea mea e faataua.

Faafetai i lenei galuega. Faafetai i le toese lea i Vaiaata, le Susuga i le Minisita o Leoleo ma Falepuipui aua lenei galuega o lo o faagasolo lava galuega o le falepuipui ma isi fale o le maota, aua lava le toese lea i Vaiaata, aemaise lava le ola toefuataina o alo ma fanau a le atunuu o lo o faapena ona i ai i Vaiaata.

E faapito sau faafetai i le toese lea i Vaiaata ona o le galulue o tagata i galuega o lo o faatino ai, o maumaga, o togafai, aemaise o fualauaina ma togalaau e faaoga e fai ai taumafa, o kapisi, o tamato, o mauketi, ia ma tulaga faapena, faafetai. O le toese lea i Vaiaata, e pei foi lele o se aoga faifaatoaga, ona e ese le ola o maumaga i i, lelei le eleele. O le mea lena e faafetai atu ai i le Minisita aemaise foi le Pulega ma le Komesina o Leoleo ma Falepuipui aua le atinaeina o le toese i Vaiaata. Faafetai mo ia galuega. O le isi vaega, e faafetai i le toese lenei i Vaiaata, ona o le tele o meamata o talo ma fai lea e aumai i Tanumalala. Ioe. Lea e tausi ai le toese lea i Tanumalala. Faafetai. O lea e momoli le faafetai i le Minisita ma le Komesina ma tulaga i leoleo ma le falepuipui lea, tulou, faafetai mo nei galuega. Ioe, ua moni lava le faalupega, o le ola toefuataina. O lona uiga o lea ua toefuataina le ola, le soifua, le amio, aemaise o le pulea lelei o lenei toese e pei ona i ai. Mo le silafia e seasea ni mea e tupu mai i le toese lea i Vaiaata, ioe. E seasea i ai ni faafitauli po o ni pagota ua sosola. Aisea? Maopopo pulega, lelei puipuiga. Sa gata lava i aso ia. A o lenei 5 tausaga ma le agai mai, o le mea lea, faafetai i le Minisita ma le Komesina o Leoleo ma leoleo foi o lo o galulue ai, faamalo faafetai i le tatou toese lea i Vaiaata. Faamalo i galuega lelei.

Ia, ona ou faasee mai lea i le taulaga i Salelologa. Ia, tasi lava lenei taulaga o lo o atiae pea ma atinae, tele galuega lelei lea ua faatino i Salelologa. O le galuega o lo o faatino nei, o le faletele lea o le NPF lea e fai mai i gatai o le maketi fou, ou te iloa pe fogafale 3 pe fogafale 4. O le mea lea faafetai i lau Afioga i le Minisita o Tupe mo lenei atinae tele mo tatou i Savaii, aemaise foi le Matagaluega, faafetai i lenei galuega, o lea ua ou faalogo o le a fai ai nisi ofisa o le Malo i Savaii, faigofie galuega, faigofie feoaiga, aemaise foi o penisione a tagata matutua ma tagata faigaluega i tupe e fia maua. Faafetai mo le galuega lea, o lea lava o lo o faaauau pea, ou te iloa po o lena masina ona umusa foi lea o lenei galuega tele.

FOFOGA FETALAI: Malo faafetai. Ia, ou te vaelupeina le saunoaga a le sui usufono, saunoaga matagofie ma le saunoaga faa-Toeaina. Ia, ae i ai le manatu ona o lea ua tatou taunuu i le tatou taimi e muta ai le tatou galuega ma le siui o galuega o lenei aso.

O le ala lea e i ai le manatu, ia se i tala soifua i le aso a taeao ona faamaea lea o le saunoaga a lau Afioga i le Taulagi. Ia, ae i ai le manatu malie ia e faauma e oe le tatou Fonotaga i se tatalo tatou manava ai. Faaiu mai le tatou Fonotaga i se tatalo.

*Na motusia felafolafoaiga ina ua tolopo Taulumaga a le Fono Aoa
Faitulafono i le itula e 12:57 i le aoauli seia aulia le Aso Lulu, 03 o
Fepuari i le itula e 9:00 i le taeao.*